

# Knare Musenke Maki Kre'nea Naneke

---

Ti frezmante Joni erizamofu naneke  
(*Mat 3:1-12, Luk 3:1-18, Jon 1:19-28*)

**1** <sup>1</sup>Anumzamofu Mofavre Jisas Kraisi knare musenkea ama agafa hu'ne.

<sup>2</sup>Kasnampa ne' Aisaia amanage huno avona krentene, *Antahiho, nagra huntanenkeno nagri naneke erino ome huamahu ne'mo'a ugagota kagrira huganteno, kana retro hugahie.* <sup>3</sup>*Ka'ma kopinti mago'mofu agerumo amanage huno kezanetie, ramofo kana retro nehutma, kama vania kana erinte fatgo hiho.* (Aisa 40:3, Mal 3:1)

<sup>4</sup>Ka'ma mopafinti mono ti frezmante Joni'a eama nehuno, agafa huno kumi'zmigu zmagu'ama rukrahe hanegeno apasezmante mono tima fresaza'zanku huama huno zamasmine. <sup>5</sup>Maka Judia kazigati vafe'mo'zane Jerusaleti'ene, agrite maka'mo'za vu'za huama kumizmia ome hazageno, Jodani timpina mono tina frezmante'ne. <sup>6</sup>Hagi Joni'a kemori azokate tro hu'nea anakre ku'a hu'nenno, zgagfa akuruteti tro hu'nea amu nofi afafafi rugagino hu'nenno, kenu ene afi' tumemofu tima'ane nenea nere. <sup>7</sup>Hanki mago'ma henkama ne-emo'a nagrira nagetereno hanave'ane ne' neankina, prihu'na aga anomofonte anakinea nofira kazufega osu'noe. <sup>8</sup>Nagra tintfanu mono tina freneramantoe. Hianagi Agra Ruotge Avamunu, mono tina freramantegahie, huno huama huno zmasamine.

Joni'a mono ti Jisasina frente'nea naneke  
(*Mat 3:13-4:11, Luk 3:21-22, 4:1-13*)

<sup>9</sup>Ana knafi Galili kaziga Nazareti kumateti Jisasi'a egeno, Joni'a Joda timpini mono ti frentene. <sup>10</sup>Timpinti anama Jisasi'a marerino ne-egenno, mona kamo hagro nehigeno Ruotge Avamumo maho namagna huno hareno Agrite emanine. <sup>11</sup>Monafinti mago agerumo amanage hu'ne, Kagra navesimanegantoe mofavre'nimokagina muse hugantoe.

<sup>12</sup>Avamumo'a ame huno ka'ma kopi atufegeno vu'ne. <sup>13</sup>Ka'ma kopi 40ti'a kna umani'negeno, Sata'a revatga hu'ne. Agra afizga kfone maninegeno, ankeri vahe'mo'za aza hu'naze.

**Jisasi'a Galili kaziga mono eri'za erigafa nehuno, amage'ma antesaza  
vahezga avare'nea naneke**

*(Mat 4:12-22, Luk 4:14-15, 5:1-11)*

<sup>14</sup>Jonima kina huntageno, Jisasi'a ana knafi Galili vuno Anumzamofoknare so'e naneke huama huno, <sup>15</sup>Anumzamoma huhampri'nea kna hago eforehie. Anumzamofokumamo'a hago eravao hie. Tamagu'a rukrahe huta knare musenkere tamentinti hiho.

<sup>16</sup>Galili timofo ankenare Jisasi'a nevuno Saimoni'ene Endrukea, kogonararemoke, kuko timpi netrakeno ome znagene. Na'ankure znagra nozame ahe ne'trene. <sup>17</sup>Jisasi'a anage huno znasami'ne, enamage antenkena, Nagra vahe'ma avazu hu'zana huranami'neni. <sup>18</sup>Higeke ame huke kuko zani'a netre'ne amage anteke vu'na'e. <sup>19</sup>Ananteti Jisasi'a mago'ene osi'a nevuno, Jemisi Zebeti nemofokino nefu'ene ventefi mani'ne'za kuko zamia nehatazageno ome zamage'ne. <sup>20</sup>Neznageno zanagi higeke, neznafe Zebetini eriza vahe'a nezmatreke ame huke amage eme ante'ne vu'na'e.

**Jisasi'a havi avamu hu megi atrenea naneke**

*(Luk 4:31-37)*

<sup>21</sup>Zamagrama Kapanea kumate'ma umahanatite'za, mni fruhu knama egeno'a ame huno Jisasi'a osi mono nompivi vuno rempi ome huzami'ne. <sup>22</sup>Vahe zagamo'za tusiza hu'za rempima huzamia zankura antri hu'naze. Na'ankure kasegere ugagota hu'naza vahe'moza nehazaza osu'neanki, hanave'ane agi me'nea vahe'mo rempi hu'nezamiakna hu'ne. <sup>23</sup>Anama nehigeno'a mago'mofona agu'afi havi avamu fre'nea ne'mo osi mono nompinti kezatino, <sup>24</sup>Nazareti Jisasi'a na'a hurantenaku nehane? Tagri tazeri haviza hunaku neampi? Nagra antahi'noe, Kagra Anumzamofona Ruotge hunamoke. <sup>25</sup>Hianagi Jisasi'a kesuno, taganenka atrenka atiramio! <sup>26</sup>Ana havi avamumo azeri hirahi hirahi nehuno, tusiza huno krafage nehuno ana ne' agu'afinti atiramino evu'ne. <sup>27</sup>Ana'ma higeza vahe'mo'za tusiza hu'za zmagogogu nehu'za, ontahige antahige hu'za, amazana na'a fore nehie, kahefaza hanave'ane rempi nehuno, havi avamumofona kea higeno ke'a amage nente. <sup>28</sup>Anama hiazamofoknemo'a maka Galili kaziga ame huno vuno eno hu'ne.

**Pita nenemo Jisasi'a azeri knamre'nea naneke**

*(Mat 8:14-17, Luk 4:38-41)*

<sup>29</sup>Hanki osi mono nompinti' atirami'za Saimonine Endru kizini nonte Jemisi'ene Joniza vu'za umareri'naze. <sup>30</sup>Hagi Saimoni nenaro nerera'a

avufa amuhohu kri erino maseno maninegeno, Jisasina krimea eri'nea kea ame hu'za ome asami'naze. <sup>31</sup>Ana a'te vuno azante ome azerioti'geno, avufga teveha nehiazamo atrentegeno, otino ne'za krezamante'ne.

**Jisasi'a hakare kri vahe' zmazeri knamarenea naneke**

*(Mat 8:16-17, Luk 4:40-41)*

<sup>32</sup>Zage uramino kinagasegeno, vahe'zgam'o'za krimea eri'naza vahe'ene, havi avamu zamagu'afi mani'nea vahera zamavre'za Jisasinte e'naze.

<sup>33</sup>Ana rankumate vahe'mo'za ana kasante eme eritru huvhare'naze. <sup>34</sup>Ana nehazageno rama'a ruzahu ruzahu krimea eri'naza vahera zmazeri so'e nehuno, havi avamu rama'a zmagu'afi mani'neana hufegi netreno, ama anazankura kea osiho huno i'o huzmantene. Na'ankure havi avamumo'za Agrira keza antahiza hu'naze.

**Jisasi'a nunamu nehuno rempi huzami'nea naneke**

*(Luk 4:42-44)*

<sup>35</sup>Kotu hanimpi Jisasi ana nompinti atiramino vuno vahe omani'afi umani'nenono, anantega nunamu hu'ne. <sup>36</sup>Hagi Saimoni ene mago'amo'za oti'za hake'naze. <sup>37</sup>Ome age'za erifore nehu'za, mika vahe'mo'za kagriku nehakraze hu'za asami'naze. <sup>38</sup>Anage huno Agra kenona zmirera zamasmine, erinketa tava'ontema me'nea kumatamimpi vuta, anantega mono kea huama haneno. Na'ankure nagra e'ina agafare e'noe. <sup>39</sup>Anage nehuno maka Galili kaziga vano nehuno, osi mono nontamimpi mono naneke huama nehuno, havi avamutmi zamagu'afi freneana hufegi atrezmante'ne.

**Jisasi'a fugo namune ne' azeri so'e hu'nea naneke**

*(Mat 8:1-4, Luk 5:12-16)*

<sup>40</sup>Hagi mago fugo namurenea ne'mo Jisasinte eno kepri huno agiafi traka humaseno, muse hugantoanki Kagrama nazeri knamrenaku hanunka, amne nazeri agru huo, huno antahigene. <sup>41</sup>Jisasi'a asunku hunenteno, azana asuteno avako nehuno anage hu'ne, Nagri'ma navesiana knare huo! Higeno, <sup>42</sup>ana fugo namumo'a ame huno vgarentegeno agru hu'ne. <sup>43</sup>Hanki Jisasi'a amazama hugantoazankura vahera ozamasamio huno hanave avumro nenteno, ame huno hunteno, <sup>44</sup>Kma antahio, ama'nazama hugantoa zankura mago'mofona osamitfa huo. Hianagi prisi nete vunka kavufga ome averi hugeno keno. Anante Mosese'ma ko'ma huno kazeri agrumahu ofa ome hugahane hu'nea kante ome hugeno, veamo'za nege'za hago agru hu'ne hu'za hiho. <sup>45</sup>Hianagi ana ne'mo nevuno, kri'ama azeri knamare neazankura vahepi huama nehige'za, rama'a vahe'mo'za nentahizageno, ana kemo'a ra hiazanku, rankumapina Jisasi'a eamara huno omeno, megia rama'a vahera omani'naza kumapi umaninege'za rama'a vahe'mo'za anantega eme ke'naze.

**Jisasi'a aga stinea nera azeri so'e hu'nea naneke**

*(Mat 9:1-8, Luk 5:17-26)*

**2** <sup>1</sup>Mago'a kna evutegeni Jisasi'a rukrahe huno Kapanea nemanian kumate emani'nege'za, Jisasi'ma e'ne kea vea'mo'za antahi'naze. <sup>2</sup>Rama'a vahe krerfamo'za atru hu'za nompine kasante'ene mani titipanehzageno, mono kea zamasmine. <sup>3</sup>Mago'a vahe'mo'za aga sti'nea ne' avare'za e'naze. <sup>4</sup>a vahe'mo'za sesenku hu'za erizafa hu'za e'naze. <sup>4</sup>Zamagra zafahu'za ufrega osu'naze, na'ankure rama'a vahe krefamo'za manihiza hazageno, Jisasi'ma mani'nea avamenteti nomuza erianasege'za, ana nera sesenkufi mase'nege'za nofite azerineza atrageno akoheno urami'ne. <sup>5</sup>Avare'za e'namokizmi zamentinti Jisasi'a negeno, aga sti'nea nera amanage huno asami'ne, Ne'nimoka kumika'a apasegantoe. <sup>6</sup>Hianagi anampina mago'a kasere ugagota hu'naza vahe'mo'za mopafi mani'ne'za, anage hu'za zmagu'afina antahi'naze. <sup>7</sup>Na'a higeno ama ne'mo'a kumira atregantoe nehie? Anumzamofu huhaviza hunente! Iza Agra kumira atregantoe nehie, Anumzamo ke kumira atregantoe hu'za antahinaze? <sup>8</sup>E'i anage hu'za zamagesa nentahizageno, Jisasi'a zmagu'afinegeno, ame huno zmasami'ne, Na'a hiegetma tamagu'afina e'inahu antahintahia nehaze? <sup>9</sup>Agama sti'nea nera ina'i kema hanua kemo fru huntegahie. Kumi ka'a atregantoe hanua kemopi, ontinka sesenku ka'erinka vuo hanua kemo fru huntegahio? <sup>10</sup>Hianagi tamagra antahitma ketma hugahaze. Vahe'mofo Mofavremo'a, ama mopafi vahe'ma kumi'ma atrente hihamua erineankino, kumira atregantoe. <sup>11</sup>Nagra hugantoe otinka sesenkuka'a erinka nonka'arega vuo. <sup>12</sup>Higeno ame huno otino sesenku'a eri kofino mika vahe zamure atiramino vu'ne. Nevege'za mika vahe'mo'za zamagogo fege'za, Anumzamofu agi erisaga nehu'za, e'inahu ruzahu ruzahu avu'avazana nonkonaza erifore nehie, hu'naze.

**Livai agi hu'nea naneke**

*(Mat 9:9-13, Luk 5:27-32)*

<sup>13</sup>Henka ete Jisasi'a Galili tiru ankenarega nevege'za, veamo'za eri hantage'za mani'nerega azageno rempi huzami'ne. <sup>14</sup>Agra nevuno Alfiasi nemofo agi'a Livai takisi e'neriza osi nompini mani'negeno ome keno, eme namage anto higeno otino amage vu'ne.

<sup>15</sup>Hagi Jisasi'ma Livai nompini ne'za ome ne'negeno'a, rama'a takesi zagoma eneriza vahe'mo'zane, kumi vahe'mo'za Jisasi'ene amage'ma nentea disaipol naga'ane magopi ne'za ne'naze. Na'ankure rama'a vahe'mo'za Jisasi'ne amagera ante'naze. <sup>16</sup>Kasere ugagota hu'naza vahe'ene, Farisi vahe'mo'zama, kazageno kumi vahe'ene takisi zgo e'neriza vahe'ene, magopi tine nezama nenazageno, na'a higeno takesi e'neriza vahe'ene kumi vahe'ene magopina ne'zana nene? Hu'za

amage'ma nentaza disaipol nagara zmantahige'naze. <sup>17</sup>Jisasi'a ana naneke nentahino amange huno zamasmi'ne, krime e'orinaza vahe'mo'za tusa vahetera novaze. Hanki krime eri'naza vahe'mo'za tusa vahetera nevaze. Nagra fatgo vahe kehunakura omenoanki, kumi vahe kehuku e'noe.

**Ne'zama a'o huzamofa naneke**

*(Mat 9:14-17, Luk 5:33-39)*

<sup>18</sup>Hagi Joni amage'ma nentaza disaipol nagamo'zane, Farisi mono vahe'mo'za, ne'zana a'o nehu'za Jisasinte e'za anage hu'naze. Na'a higeno Joni amage'ma nentaza disaipol vahe'ene Farisi vahe'mo'za ne'za a'o nehazageno, Kagri kamagema nentaza disaipol vahe'mo'za ne'zana a'o nosaze? <sup>19</sup>Jisasi'a anage huno zmasami'ne, aravema hunakuma hirema etruma hu'naza nagamo'za aravema hunaku hu'nesia ne'ma zamagri enema mani'nenige'za ne'zana a'o hugahazafi? Aravema hu'naku hu'nesia ne'ma mani'nenigeno'a, ne'zana a'o osugahaze. <sup>20</sup>Hianagi mago'a kna ne-eankino, aravema hunaku hania ne'ma avare'za vutesageno, ana knafi ne'zana a'o hugahaze. <sup>21</sup>Hagi mago vahe'mo'e huno korapa kenama tagato hu'nerera kasefa tavravea erinteno ohatigahie. Sese nehanigeno ampimpi nehuno mago'ene ruragato hura hu'zanku anaranosie. <sup>22</sup>Magore huno vahe'mo'a kahefa wainia, atafa tintafema zgakfa akrute tro huntepina taginonte. Na'ankure wainimo'a ana tafena rutagato hanigeno, wainimo'ene ana tintafemo'enenena haviza hugaha'e. Hagino kahefa waini'a kahefa tintafempi tagintegahie.

**Mni fruhu knazupa (Sabati) kasege ruhantagi'naza naneke**

*(Mat 12:1-8, Luk 6:1-5)*

<sup>23</sup>Mago mni fruhu knazupa Jisasi'a witi hozafi rukitagino nevigeno, Agri amage'ma nentaza disaipol naga'mo'za mago'a witi eritaniza nene'za vu'naze. <sup>24</sup>Ana hazageno Farisi vahe'mo'za anage Jisasinkura hu'naze. Ko, na'a hige'za kasegemo mni fruhu knazupa osiho hu'neazana nehaze? <sup>25</sup>Agra anage huno zmasami'ne, Deviti ene magoka vu'naza vahe'mo'za, zmagama atege'za hu'naza zana tamagra hampritma ontahinazo? <sup>26</sup>Abiatama, uagota Prisima maninerera, Deviti'ma Anumzamofa nOMPI ufreno, prisi vahe'moke nenea Bretia erino neneno zami'neana, kasegemo'a prisi vahe'mo'zage negahaze hu'nea Bretia ne'neazamofa kea ontahineta nehazo? <sup>27</sup>Huteno Jisasi'a anage huno zmasami'ne, Anumza'mo'ma mni fruhu knama anteneana, vahe'mofa aza hinogu antene. Hagi vahe'mo'za mni fruhu kna aza hanazagura ontene. <sup>28</sup>Hagi Vahe'mofa Mofavremo enena mni fruhu knamofona ra mani'ne.

**Jisasi'a aza sti'nea ne' mni fruhu knazupa eri so'e hunte'nea naneke**

*(Mat 12:9-14, Luk 6:6-11)*

**3** <sup>1</sup>Mago'ane Jisasi'a osi mono nOMPI ufregeno, aza stinea nera anampinka mani'ne. <sup>2</sup>Hagi vahe'mo'za Jisasi'ma aza stinea ne'ma azeri so'e mni fruhu

knazupa hanige'za, keaga Agrira huntessagu zamua antete'za mani'naze. <sup>3</sup>Hagi Jisasi'a azama sti'nea ne'mofonku anage hu'ne, ama vahe'zgamofu zmvuga eme otio! <sup>4</sup>Anante Jisasi'a anage huno zmasami'ne, mni fruhu knazupa vahe aza hanuna zamo'a kasegefina knare tavutava hugahumpi, havi tavutva hugahune, hifi vahe aza hugahumpi, vahe ahe frigahune? Higeno ke'zamia omanene. <sup>5</sup>Zmarimpamo hanavetia zanku, arimpa henezmanteno keganti kegama huno nezmageno, asunku huno aza sti'nea nera kzana rusuto higeno azana rusutegeni, azamo'a so'e hunte'ne. <sup>6</sup>Farisi vahe'mo'za ame hu'za atirami'za Heroti naga'ene Jisasina ahe frisanza naneke ome huge antahige hu'naze.

### **Tusi'a vea tinkenarega mani'naza naneke**

<sup>7</sup>Anampinti Jisasi'ene amage'ma nentaza disaipol nagamo'za atre'za tinkenarega nevazageno, Galiliti'ene Judiati'enena tusi'a vahe krefamo'za avaririza vu'naze. <sup>8</sup>Jerusale kumateti'ene, Itumia kuma Joda timofu kantu kazigati'ene Taia kumapinti ene Saido kuma agu'afinti'ene tusi'a veamo'za Jisasi'ma hiazamofu kema nentahiza, erihantge'za Agrite omeri atru hu'naze. <sup>9</sup>Tusi'a vahe'ma emetruma hazazanku, amage'ma nentaza disaipol naga'agu mago vente retro hunantenkeno veamo'za naretufe'za omeho huno zmasamine. <sup>10</sup>Na'ankure rama'a vahezga zmazeri so'e hu'negu, krima eri'naza vahe'mo'za Jisasima avako hanageno kri zmimo'ma atre zmantesiegu oretufe aretufe hu'naze. <sup>11</sup>Hagi agru osu havi avamu'mo'za, Jisasi'ma nege'za upri hu'za ranke hu'za, Anumzamofu nemofoge hu'naze. <sup>12</sup>Hianagi ana havi avamukura Jisasi'a huhankavetino, Nagra iza'na manino'e, vahera ozmasamiho huno huzmante'ne.

### **12fu'a Aposol naga'a huhampri'nea naneke**

*(Mat 10:1-4, Luk 6:12-16)*

<sup>13</sup>Hagi Jisasi'a agonarega marerino umniteni, avesi'nea vahe zamagi hige'za agra maninerega e'naze. <sup>14</sup>Azageno 12fu'a aposol namage'ante nagare huno huhampri zmantene. Agrane mani'ne'nageno huzmantesige'za mono kea huama hanagu huhampri nezmanteno, <sup>15</sup>havi avamu'ma huzmante hihamu zmene. <sup>16</sup>12fu'a huhamprizmanteno, Saimoninkura Pita'e huno agi'a antemi'ne, <sup>17</sup>Zebeti mofavre'rarena, Jemisine Joni kizanigura Bonzis hu'ne, ana agimofona agafa'amo'a mona krafagemofu Mofavre huno znagia ante'ne. <sup>18</sup>Endruki, Filipiki, Vatoromuki, Matiuki Tomasi'e, hanki Arafiasi nemofo agi'a Jemisi'e. Hagi Tatiasiki, mago ne' agi'a Saimoni Zaleti nagapinti nere. <sup>19</sup>Hanki Judasi Isakarioti, henka'a Jisasima ha' vahe'amokizmi zmazampi komoru huno avrentesige'za ahesaza nere.

### **Jisasinku Belsebul hanavefi eri'za enerie hu'za hu'naza naneke**

*(Mat 12:22-33, Luk 11:14-23, Luk 12:10)*

<sup>20</sup>Jisasi'a kumatega ete vige'za, hakare veamo'za eri hantage'za ome atru hazage'za, Jisasi'ene amage'ma nentaza disaipol nagamo'za ne'zana

neknazmia omanene. <sup>21</sup>Ana kema naga'amo'za nentahiza avrenaku vu'naze. Na'ankure zamagra'ma zmagesama antahi'zana hago negi nenegahie hu'za hu'naze. <sup>22</sup>Hagi Jerusaleti erami'naza kasegere ugagota hu'naza vahe'mo'za anage hu'naze. Belsebul agu'afi fre'negeno, ugagota havi Avamumofu hanavefi, havi avamura hunente hu'naze. <sup>23</sup>Anage nehzageno Jisasi'a nentahino, kehige'za azageno fronka kea anage huno zmasmi'ne, inankna huno Sata'a, Satana ahenanti tregahie? <sup>24</sup>Hagi mago rankumapi vahe'mo'za refko hu'za ha' oriente arente hanu'za oti hanave otigahaze. <sup>25</sup>Hagi mago nompinti vahe'mo'za refko'ma hu'za ha' oriente arente hanu'za, oti hanave otigahaze. <sup>26</sup>Hagi Sata'ma otinoma agra'ama ha'ma renenteno, amu'nompinti refko'ma haniana, oti hanave otino vgaregahie. <sup>27</sup>Hianagi mago'mo'e huno hanave ne'mofo nompinti kumzafama asenakura, amane vuno musufa ose'nenno, ana nera azerino anaki atreteno, anante noma'afinti'zana enerie.

<sup>28</sup>Tmage hu'na nerasmue, Anumzamo'a vahe'mo'za ana miko kumi'ma hanazane huhavizama huntésaza kumira apase zmantegahie. <sup>29</sup>Hianagi Ruotge Avamumofu huhaviza huntésimofona, kumi'a eri atre ontesigeno, kumi'amo'a mevava hugahie. <sup>30</sup>Na'ankure zmagra hu'za, Jisasina agru osuno havi avamu ene mani'ne hu'za hu'naza kegu hu'ne.

**Tamage naga'agu Jisasi'a hu'nea naneke**  
(*Mat 12:46-50, Luk 8:19-21*)

<sup>31</sup>Anante Jisasi nerera'ene agnahe'zane e'za fegi'a eme oti'neza, ome asaminkeno eno hu'za ke huzmante'naze. <sup>32</sup>Tusi'a vahe'mo'za mani kaginte'nazafi anage hu'za ome asami'naze, antahio, negarera'ene kaganahe'zane kasarahaheza megia mani'ne'za kagriku ke nehaze. <sup>33</sup>Ana kenona'a amanage huno zmasami'ne, iza'za nagri nenrera'ene naganaha'za mani'naze? <sup>34</sup>Keganti kegma huno manigagi'naza vea nezmageno anage hu'ne, keho, nenrera ene naganaha'za ama mani'naze. <sup>35</sup>Iza'zo Anumzamofu avesizama amage'ma nentamo'za, nenaganaki nensaroki nenreraki hu'za mani'naze.

**Avimaza avi rurani'nea fronka naneke**  
(*Mat 13:1-9, Luk 8:4-8*)

**4** <sup>1</sup>Mago'ene Jisasi'a ra tiru'mofo ankenare mani'nenno naneke erigafa huno rempi huzami'ne. Tusi'a vahe krerfamo'za regorave hazageno, Jisasi'a votifi marerino maninege'za, tusi'a vahe krerfamo'za tiru ankenarega mani'naze. <sup>2</sup>Agra rama'a fronka ke zmasami'ne. Rempima huzamifina, anage hu'ne, <sup>3</sup>kma antahiho! Hoza ne'mo avimaza rurani'ne hozarega vu'ne. <sup>4</sup>Ana'ma huno ome runernigeno, mago'a avimzamo'a kamofu ankinafi evuramigeno, namamo'za eme ne'naze. <sup>5</sup>Mago'a avimaza avimo'a havege huno rama'a mopa omanenefi evuramino ame

huno hagene. Na'ankure havege huno osia mopa me'negeno'e. <sup>6</sup>Zagema hanatino'a teosaparene, na'ankure rafunamo'a fempina uoraminegeno osapare'ne. <sup>7</sup>Mago'a avimaza avimo'a ave'ave trazampi evuramigeno, aveave trazamo'a hagene, reutrako higeno raga'a reonte'ne. <sup>8</sup>Hu'neanagi mago'a avimzamo'a tima'ane mopafi evuramiteno hagene raga'a rente'ne. Mago'amo'a 30ti'a rentegeno, mago'a 60ti'a rentegeno, mago'a wan 100 ti'a rente'ne. <sup>9</sup>Ana nehuno anage hu'ne, izano agesa me'nenigeno nentahisimofona, atregeho ama kea antahise hino.

**Fronka kema zamasmine'a kemofa agafa'e**  
(*Mat 13:10-17, Luk 8:9-10*)

<sup>10</sup>Anama huteno Jisasi'ma Agrakema umani'negeno, mago'a manigagi'naza vahe'mo'zane, <sup>12</sup>fu'a amage'ma nentaza disaipol nagamo'za, ana fronka keramimofa agafa'a antahise hunaku antahige'naze. <sup>11</sup>Jisasi'a anage huno zmasami'ne, Anumzamofa kumamofa oku'a antahintahia tmagrira ko tamine. Hianagi meg'i'ama mani'naza vahe'mo'za fronka kege nentahize. <sup>12</sup>Ana higu Avontafepina anage hu'ne, *kegahazanagi keama osugahaze. Antahigahazanagi antahi amara osugahaze. Zamagra aru zmagu'a rukrahe hanageno Anumzamo kumizimi eri atrezankure.* (Aisa 6:9-10) <sup>13</sup>Jisasi'a anage huno zmasami'ne, ama fronka kemofa agafa'a antahi ama'ma osanutma, inankna hutma mika fronka kemofa agafa'a antahi amara hugahaze? <sup>14</sup>Avimaza rurani'nea ne'mo'a, Anumzamofa ke ome krine. <sup>15</sup>Mago'a avimaza kamofa ankinarega evurami'neana, mago'a vahe'mo'za Anumzamofa kea nentahizageno, Sata'a ame huno zamagu'afima krinea kea eritrene. <sup>16</sup>Havege mopafima rurani'neana, Anumzamofa kema nentahi'za, muse hu'za ame hu'za eneri'ze. <sup>17</sup>Hianagi zmagu'afina rafuna ore'nazanki'za oti hanave otinazankiza, anante'ma Anumzamofa kegu hu'za hazenke zano, zmazeri haviza huzama fore hige'za, ame hu'za atre'za nevaze. <sup>18</sup>Mago'amo'za ave'ave trazampi avimaza ruranineankna hu'naze. Anamo'za Anumzamofa kea antahinazanagi, <sup>19</sup>mopafi zankuke zmagesa nentahi'za, zago afu fenoma eri atruma huzamo rezmatga nehuno, mago'azama zamesinte'zamo zmagu'afina efreno Anumzamofa nanekea reutrako higeno ne'za raga'a renonte. <sup>20</sup>Hianagi tima'ane mopafi rurani'nea avimazana, zamagra Anumzamofa kea antahi ankere'za, ana kea e'neri'za nena raga'a renentaze. Mago'mo'a 30'a rentegeno, mago'mo'a 60'a rentegeno, mago'mo'a 100ti'a renente.

**Tavi'mofa fronka naneke**  
(*Luk 8:16-18*)

<sup>21</sup>Jisasi'a amanage huno mago'ane zamasmine, rampe tavi'ma rekruma hazana, sipa gampi ome nentafi, kavo agu'afinka ome nentazo? A'o



anara nosaze. Rekrū hutma tavima rekrū hunte azotare ome nentaze. <sup>22</sup>Na'ankure miko'zama fra'ma ki'nesiazamo'a, eama nehanigeno, oku'a me'nesiazamo'a, msare eama hugahie. <sup>23</sup>Izano agesa me'nenigeno nentahisimofona, atregeno ama kea antahise hino. <sup>24</sup>Mago'ane anage huno zamasmī'ne, kema nentahizana antahi so'e hiho. Tamagrama amisaza avamente, ana avamente tamagrira neramamino, mago'ane agofetu huno tamamigahie. <sup>25</sup>Na'ankure iza'o eri'nenimofona mago'ene agofetu huno amigahie. Hagi iza'o e'orinesimofona, osiama eri'neniazana eritre vgaregahie.

### **Avimza hage'zamofō frōnka naneke**

<sup>26</sup>Jisasi'a mago'ane anage hu'ne, Anumzamofō kumamo'a, mago vahe'mo avimza avi mopafi rurano kriankna hu'ne. <sup>27</sup>Kriteno umasenegenō feru ene kenage'enena hageno, ana avimza avimo'a ru hanana huno hagegenō, anama hageana nankna huno hage'neo agra ontahine. <sup>28</sup>Mopamo'a agra'a azerinena higeno ne'zama'a rente'ne, esera asina reno rampa'a fore huteno, anante amosare aheno, rampareara nezana rente avinete. <sup>29</sup>Anantera raga'a renteno nena hutegenō, agra kazaki kazinteti eme taga hu'ne, na'ankure hozama hamarekna egeno'e.

### **Masteti ragamofō frōnka naneke** (*Mat 13:31-32,34, Luk 13:18-19*)

<sup>30</sup>Jisasi'a mago'ane anage huno zmantahige'ne, inankna ke hunteta Anumzamofō kumakura hugahune. Inankna frōnka ke hunteta eriamā hugahune? <sup>31</sup>Masteti raga'agna hunege'za mopafi negrize, ama mopafima me'nea avimzana agatereno onensatfa hu'ne. <sup>32</sup>Karitageno'a hageno nena huno, maka hozafima me'nea ne'zana ra huno agetenereno, rama'a azankuna'a hageno vuno eno higeno, maka afi' namamo'za ana zafamofō tonapi nona eme kigahaze.

### **Jisasi'a frōnka kefinti ke zmasami'nea naneke**

<sup>33</sup>Ana nehuno rama'a frōnka kefinti zamagrama antahi ama hanaza avamente zmasami'ne. <sup>34</sup>Agra mago'a kema hunakura frōnka kefintike zamasmī'ne. Ana hu'neanagi amage'ma nentaza disaipol naga'ma zamagrake mani'nageno, eriamā huno maka'zana zmasami'ne.

### **Jisasi'a ke higeno timo rurava he'nea naneke** (*Mat 8:23-27, Luk 8:22-25*)

<sup>35</sup>Ana zupa kinaga segeno Jisasi'a amage nentaza disaipol naga'agura hu'ne, erinketa kantu kaziga tinkenare vamneno huno hige'za, <sup>36</sup>vahe krerfama zmatrete'za Jisasi'ma mani'nea ventefi mareri'za vazageno, mago'a ventea zamagrane vu'naze. <sup>37</sup>Nevzageno tusi'a ununko atuno,

tina erikranto kranto nehuno, ana ventefi timo'a marevite'za higeno, timpi tami'za hu'ne. <sup>38</sup>Hagi Jisasi'a ventemofona arigarega fita runo mase'negeno, azeri oti'za anage Agrikura hu'naze. Rempu hurami ne'moka, timo'ma tazeri nakri'za nehiana nonkano? <sup>39</sup>Anante otino zahomofona kenesuno, tami avazago huno timofona ke higeno, ako heno urami avazagene. <sup>40</sup>Ana higeno Jisasi'a anage huno zmantahige'ne, Nahigetma amanahu huta koro nehaze? Tamentintia nosazo? <sup>41</sup>Ana nehige'za tusi'a zamagogo fege'za, Inankna ne'mo kea nehigeno zahomo'ene timo'ene ke'a antahine hu'za hu'naze.

**Jisasi'a negi ne'mofu agu'afinti havi avamu hunte'nea naneke**  
(*Mat 8:28-34, Luk 8:26-39*)

**5** <sup>1</sup>Ventefi vu'za Galili timofo kantu kaziga'a Gerasin uhnati'naze. <sup>2</sup>Anama Jisasi'a ventifinti eneramigeno, agru osu havi avamumo agu'afi fre'nea ne'mo, ame huno hezamopinti (matipinti) tutagiha huntene. <sup>3</sup>Ana ne'mo vahe asenentea kumapi mani'nege'za, mago vahemo'e huno azerino anaki ontege, seni nofinu anaki onte'ne. <sup>4</sup>Na'ankure ana ne'mofona azeriza seni nofi'nu azampi kina renentaza aeni agare azantera kina rente'naze. Hianagi ana ne'mo'a azampine agafinema rente'nea nofira rukampruhu osi osi hu'ne. Ana higeno mago vahe'mo'a hanaveti'za azeriarava hugara osu'naze. <sup>5</sup>Mika zupa hanine, zagene vahe asenentaza kumapine agonaregane vano nehuno, rankege huno, have erino avufa tagarago hu'ne. <sup>6</sup>Jisasi'a afete mani'negeno ana ne'mo negeno, agareno agafi ome renareno, <sup>7</sup>anante ranke huno kezatino, Jisasiga marerisa Anumzamofu Mofavremoka, na'a hurante'za nehane! Nagra Anumzamofu agifi huhanavetina negasamue, tazeri havizana osuo! <sup>8</sup>Na'ankure Jisasi'a havi avamumofonku atiraminka evuo huno hu'negeno'e! <sup>9</sup>Jisasi'a kagi'a iza'e huno antahigegeno? Nagini'a hakarena mani'noe, na'ankure tagra rama'a sondia vahe mani'none. <sup>10</sup>Jisasiga amafintira hurantegeta atreta ovamneno huno kazikazi huno asami'ne. <sup>11</sup>Agonamofu asoparega rama'a afu'mo'za ne'za nene'za mani'naze. <sup>12</sup>Ana havi avamumo'za kazigazi hu'za antahige'za, tataregeta antu afutamimofu zmagu'afi uframaneno hu'za hu'naze. <sup>13</sup>Jisasi'a knareki viho huno ana havi avamutamina huzmantege'za, ana ne'mofu agu'afinti atirami'za, afu'mokizmi zamagu'afi ufre'naze. Ana maka afu'tamina 2 tausen'a afu'mo'za agonaregati tragi'za uramiza timpi takaure'za ti nakri'za fri'naze.

<sup>14</sup>Afu kva vahe'mo'za anazanku koro nehu'za, fre'za vu'za rankumate'ene osi kumate'ene ke huganti hugma hu'za vahe zamasm'naze. Nezmasmige'za ana veamo'za nentahi'za ana'ma hu'neaza kenaku eri hantage'za e'naze. <sup>15</sup>Jisasintega e'za eme kageno havi avamu'mo'ma agu'afi fre'nea ne'mo'a anante mani'negeno ke'naze. Kukena

nehuno fatgo antahintahi erino mani'nege'za, rama'a havi avamumo agu'afi fre'nea nere nehu'za koro hu'naze. <sup>16</sup>Hagi ana nete fore nehuno afute fore hu'neaza ke'naza vahe'mo'za, onke'naza vahe'mokizmi zmasmi vgarage'za antahi'naze. <sup>17</sup>Ana vahe'mo'za Jisasinku hankavetiza, ama mopa atrenka vuo hu'za hunte'naze. <sup>18</sup>Hagi Jisasi'a ventefi marenerigeno havi avamumo agu'afi fre'nea ne'mo'a, natregena kagrane va'neni huno antahige'ne. <sup>19</sup>Hianagi Jisasi'a nagranena ovugahane nehuno, anage huno asami'ne, kumakarega vunka, vahe ka'afi Ramo'ma asunku'ma huganteno, razama so'eza hugante'nea zankura ome zmasamio. <sup>20</sup>Anage huno asamigeno atreno Dekapolisi 10ni'e nehaza kumate vuno Jisasi'ma knare huno aza hu'nea nanekea zamasmige'za, maka vahe'mo'za nentahi'za antarintru hu'naze.

**Kva ne'mofo mofa'ene korankri eri'nea a'mofo naneke**  
(*Mat 9:18-26, Luk 8:40-56*)

<sup>21</sup>Hagi Jisasi'a ete ventefima vuno kantu kaziga Galili tiru ankenare umahnatige'za, hakare veamo'za agrite e'za eme regagi ante'naze. Anama hazazanku Jisasi'a anante mani'ne. <sup>22</sup>Anante osi mono nonte kva vahe zgafinti mago nemofo agi'a Jairasi'e nehaza ne'mo, eno Jisasima eme negeno, agafi emaseno, <sup>23</sup>muse hugantoanki, osi mofa'nimo'a fri'za higena neonki, enka kzana eme antegeni ofrino manino huno antahige'ne. <sup>24</sup>Jisasi'a agrane nevigeno tusi'a vahe krerfamo'za otufe atufe hu'za vu'naze.

<sup>25</sup>Mago ara korankri 12fu'a zage kafufi eri'nea a'mo anampi mani'ne. <sup>26</sup>Zgo afufenoma'a ana krimoma vagarentesigu atrevgareno rama'a tusa vahe'mofo ome miza hu'neanagi, atage'za amizageno ana kri'amo'a vgaore erirahu'ne. <sup>27</sup>Hagi ana a'mo Jisasi agenke antahiteno tusi vea kevufinti, Jisasina amefiti zaza kena'are eme avako hu'ne. <sup>28</sup>Na'ankure antahintahi afina kukena'are ome avako hanugenoke kri'nimo'a atrenantegahie huno nentahino, <sup>29</sup>ome avako higeno ame huno korankrima eri'neazamo'a atrente'ne. <sup>30</sup>Hagi Jisasina mago'a hanave'amo nevigeno nentahino, ame huno ana vahe kevufi rukrahe huno anage hu'ne, kena ni'arera iza avako hu'ne? <sup>31</sup>Agri amage'ma nentaza disaipol naga'mo'za anage hu'za, mika vahe'mo'za oretufe aretufe hu'nazanki nahigenka, aza navako hu'ne nehane? <sup>32</sup>Hianagi Jisasi'a rukrehe huno keganti kegma huno avako hu'nemofonku hakare'ne. <sup>33</sup>Nehakregeno ana a'mo koro nehuno agu'amo'a fakifaki nehigeno kri'ama amane hu'neazanku nentahino, vea amu'nozimifi kepri huno maka kri'amo vgaranteazana huama huno asami'ne. <sup>34</sup>Jisasi'a anage huno ana aku hu'ne, Mofa, kagri ka'a kamentintimo kazeri knare hianki, karimpa frune vuo.

<sup>35</sup>Anage huno nehigeno'a, osi mono nomofo kva ne' nompinti e'naza vahe'mo'za, Jairusinku huza mofa kamo'a hago fri'neanki rempi hurami

ne'mofona kna omio. <sup>36</sup>Hianagi anama hazenkea Jisasi'a antahi amane nehuno, ana kva nera anage huno asami'ne, korora osunka kamentinti huo. <sup>37</sup>Maka vahera maniho hunezmanteno, Pitama Jemisi nefu Jonima huno z mavrege'za amage anteza vu'naze. <sup>38</sup>Ranke hu'za tusi zavi krafa hu'za zavira netageno, ana kva ne' nonte uhaniti'za ome zmage'naze. <sup>39</sup>Ana nompima unefreno'a, na'a higetma ranke hutma zavira netaze, mofavremo'a ofrineanki amane mase'ne. <sup>40</sup>Anage hiankegura zmagra kiza re'naze. Hianagi miko megia huzmantege'za mani'zageno, ana mofa'mofo nerarane, nefane nezanevareno amage'ma nentea disaipol naga'a nezamavreno ana mofa hunaragi antepinka ante'nazafinka ufre'naze. <sup>41</sup>Anante ana mofamofa azante akoheno aze'nerino Talita kum! Zamagri'a kefina osi mofa'moka Nagra kagriku huanki otio hu'ne. <sup>42</sup>Ana mofamo'a 12fu'a zgegafu hu'neakino ame huno otino kana vano hige'za tusi antri hu'naze. <sup>43</sup>Jisasi'a hanavetino ama zankura mago vahere hutma ozmasamiho nehuno, ne'za aminkeno neno huno zmasami'ne.

**Jisasina Nazareti kuma'are veamo'za zamefi humi'naza naneke**  
(*Mat 13:53-58, Luk 4:16-30*)

**6** <sup>1</sup>Jisasi'a ana kumara netreno kuma'arega ege'za, amage'ma nentaza disaipol naga'mo'za avariri'za e'naze. <sup>2</sup>Mni fruhu knama (Sabat) egeno'a agafa huno osi mono nOMPI rempi huzamigeno, rama'a vahe'mo'za antahizamo'za, antri hu'za zmagogogu nehu'za anage hu'naze, igati amanahu antahintahia erine? Iza amanahu knare antahintahizana ami'ne, nankna huno kagu'vazana eri fore nehie? <sup>3</sup>Ama kapenta ne' Maria mofavrefi? Jemisi'ma Josefi'ma Judasima Saimonikizmi nempu'zimi mani'ne. Hanki asaraha'za tagrane mani'nazafi? Anage nehu'za ha' arente'naze. <sup>4</sup>Anante Jisasi'a anage huno zmasami'ne, kasnampa ne'mofona mika vahe'mo'za antahi amiza, ra agi'a amigahazanagi, kuma'are vahe'mo'za antahi nomizageno, naga'amo'zane, noma'afi vahe'mozanena antahi omi'naze. <sup>5</sup>Anampina mago'a kaguvazana Agra eri fore osu'neanagi, mago mago kri vahete azanteno zmazeri so'e huzmantetere hu'ne. <sup>6</sup>Hanki zamentintima osaza'zankura Jisasi'a antahintahi hakare nehuno, mago'a kuma tamimpi vano huno, Agra rempi huzami'ne.

**12fu'a Aposol vahe'mofo mono erizante huzmante'nea naneke**  
(*Mat 10:5-15, Luk 9:1-6*)

<sup>7</sup>Jisasi'a 12fu'a amage nentaza disaipol naga zamagi hige'za ageno, tare tare huno hunezmanteno, agru osu havi avamu humazmante hihamu zami'ne. <sup>8</sup>Agra amana hugahaze huno zmasamine, nevanutma bretine kutmine, zagonena erinetma oviho, azompage eritma viho. <sup>9</sup>Tamaga ano vazigahazanagi, tare kukena hutma oviho. <sup>10</sup>Ina nonte'ma vanutma,

ana nompinke maninetma ana kumara atretma viho. <sup>11</sup>Mago kumate nevanage'za oramavrege, naneketimi ontahisagetma zamatreta nevuta, tmagareti kugusopa ru popo hunetretma vinke'za, anazama hanaza zamo'a hazenkefi mani'naze huno zmaveri hino. <sup>12</sup>Ana hige'za amage'ma nentaza disaipol naga'mo'za vu'za, zmagu'a rukrehe hanazegu, mono kea ome huama hu'za mika vahe zmasami'naze. <sup>13</sup>Zamagra rama'a havi avamura hunezmante'za, krimea eri'naza vahe'mokizimi, masave tagi'za frenezmente'za, zmazeri kanamre'naze.

**Mono ti frezmante Joni fri'nea naneke**

*(Mat 14:1-12, Luk 9:7-9)*

<sup>14</sup>Hagi kini Heroti'a, Jisasi agi agenkemo'a ra higeno nentahigeno, mago'amo'za mono ti frezmante Joni frinefinti oti'negu kagu'vazana nehie hu'naze. <sup>15</sup>Hianagi mago'amo'za Ilaiaj'e hu'za nehazageno, mago'amo'za hu'za, agra korapa mani'naza kasnampa vahekna nere hu'naze. <sup>16</sup>Hagi mago'ane Heroti'ma nentahino'a anage hu'ne, Joni agenama akafrinoa ne'mo otino e'negahie! Hu'ne. <sup>17</sup>Na'ankure nefu, Filipi nenaro Herotiasi, Herotima rehanare'nea agenke Jonima huama hu'neazanku, Heroti'a huzmantege'za Jonina ome azeri'za kina nomp ome ante'naze.

<sup>18</sup>Na'ankure Joni'a hanavetino ke huvava huno Herotina asamino, negafu a'ma rehanarenka a'ma erinanana kasege rufutaginka knare avu'avara osu'nane. <sup>19</sup>Ana higeno Herodiasi'a Jonina rimpa ahenteno ahe frinaku hu'ne. Hianagi ahe ofri'ne. <sup>20</sup>Na'ankure Heroti'a Joninku koro nehuno, kegva krintene. Na'ankure agra antahino keno hu'ne. Joni'a fatgo huno ruotage hu'nea nere. Joni agenke nentahino agogogu hu'neanagi, Jonima hania kema antahinakura muse hu'ne.

<sup>21</sup>Mago kankamu eforema hu'neana, Herotima kasente'nea kna fore higeno, muse huno kasente'nea ne'za nenaku atru nehazageno, agri nompima eri'zama e'neriza vahe'ene sondia vahe'mokizimi ugagota kva vahe'ene, Heroti'a ne'zana ne'ne. <sup>22</sup>Herodiasi mofamo efreno avoma eme hageazamo Heroti'ne ne'za neku zmagima hu'nea vahera zmazeri muse higeno, Heroti'a ana mofa asmimo, na'ankuro kve'ma siniazankuma nantahi kesnankena, amane kamigahue hu'ne. <sup>23</sup>Heroti'a huvempa huno ana mofara asamino, na'ankuro kavesinesia zanku'ma nantahi kesnankena, amane kegva kri'noa kumara amu'nompintira refko hu'na kamigahue. <sup>24</sup>Anage higeno ana mofa'mo atiramino vuno, nererankura na'ane hu'na ome antahigegahue? Higeno nerera'a anage hu'ne, mono ti frezmante Joni agenope hunka ome huo huno asamigeno, <sup>25</sup>ana mofa'mo ame huno Herotinte vuno, menitfa mono ti frezmante Joni agenopa rukafrika zompafi antenka erinka eme namisane huno higeno, <sup>26</sup>Kini ne'mo nentahino Joninku tusiza huno asuragi ante'neanagi, hanave huvempa kema mofa'ama agrane mani'naza vahe zamufi hunte'nea kegu

nentahino, i'ora osu'ne. <sup>27</sup>Hagi kini ne'mo'a ame huno agenama ome akafri vahe huntengeno kina nOMPI vuno, Joni agena ome akafrine. <sup>28</sup>Ana ne'mo agenopa'a zompafi erino vuno, ana mofa ome ami'geno, ana mofamo erino vuno nererana ome ami'ne. <sup>29</sup>Hagi Joni amage'ma nentaza disaipol nagamo'za ana kema nentahi'za, avufa'a eri'za havegampi ome asente'naze.

**Jisasi'a 5 tauseni'a vahe ne'za zami'nea naneke**

*(Mat 14:13-21, Luk 9:10-17, Jon 6:1-13)*

<sup>30</sup>Anante Jisasi aposol nagamo'za, ehanatiza miko'zama nehu'za, rempima hu'zaminaza nanekea eme asami'naze. <sup>31</sup>Jisasi'a anage huno zmasamine, Nagrane enketa vahe omanitega onsia umanikasa hamneno, (na'ankure vahe'mo'za vute'ete hazageno, ne'za nesaza knazimi omanenegure.) <sup>32</sup>Zamagraku vahe omani kaziga vunaku ventefi mareri'za vu'naze. <sup>33</sup>Hianagi zahufama nevazageno, hakare veamo'za e'irega vazanki hu'za nentahi'za, mopafi rugagi'za miko kumapinti veamo'za kote'za anama umanisare, ko umani'naze. <sup>34</sup>Jisasi'ma anante uhanitino ventefinti takaureno, tusi'a vea kevu nezmageno asunku huzmante'ne. Na'ankure zmagra kvazimi omani sipisipigna hu'nazageno agafa huno hakare kea rempi huzami'ne.

<sup>35</sup>Kinaga nesegeno, amage'ma nentaza disaipol naga'mo'za Jisasinte e'za anage hu'naze, vahe omani ka'ma kopi mani'nonkeno hago kinaga nesegu, <sup>36</sup>huzmantege'za hozafi kiza mani'naza kumapine, kuma tamimpi vu'za ne'zama nesazazana ome miza seho hu'naze. <sup>37</sup>Hianagi Jisasi'a anage huno zmasami'ne, Tamagratmi ne'zana zaminke'za neho, hige'za zamagra anage hu'naze, mago kafufi eriza erina miza eriga mizanteti nezana mizaseta zamigara hu'ne hu'za asami'naze? <sup>38</sup>Agra anage huno zmasami'ne, nama'a breti eri'nazafi ome keho? Huno hige'za ome kete'za e'za 5fu'a bretigi, tare nozame me'ne hu'za hu'naze. <sup>39</sup>Anante Jisasi'a amage'ma nentaza disaipol naga'a huzmanteno, zafa asinage hu'nea apepate huzmantege'za omeri atru, eme eritru hu'za maniho huno huzmante'ne. <sup>40</sup>Maka vahe'mo'za fko hu'za mago'a kevufina 100ti'a vahe nemanizageno, mago'a kevufina 50ti'a nemanizageno hutere hu'naze. <sup>41</sup>Mani'nageno 5fu'a bretine, tare noza'ene erino kesga huno monafi negeno, Anumzamofontega susu huteno, eri korino amage'ma nentaza disaipol naga'a veva hnazegu nezamino, nozamea anazanke huno refko huno zami'ne. <sup>42</sup>Ana maka'mo'za nazageno zamu hu'ne. <sup>43</sup>Nene'zama atraza bretine, noza enena zogi'za, 12fu'a eka eka kupi erivite'naze. <sup>44</sup>Bretima ne'nazana 5tauseni'a venenemo'za ne'naze.

**Jisasi'a timofo agofetu vu'nea naneke**

*(Mat 14:22-33, Jon 6:15-21)*

<sup>45</sup>Jisasi'a ame huno amage nentaza disaipol naga'a ventifi vugote'za kantu Betsaida kaziga vihogu hunezmantage'za nevageno, vahetaminkura

viho huno huzmante'ne. <sup>46</sup>Viho huno huso'e huzmanteteno, agonarega nunamu hunaku vu'ne. <sup>47</sup>Kinagama segeno'a ventemo'a timofo amunompi nevigeno, Agrake moparera manine. <sup>48</sup>Jisasi'a nezmagegeno, tusi maraguzatiza azotanu tina vakakiza vu'naze, na'ankure zahomo tusiza huno eme zmaretnefege'za, mraguzatiza nevazageno ko'ma atu masa hu'za nehigeno, Jisasi'a timofo avozare eno zmagatere'za nehige'za, <sup>49</sup>zamagrama timofo agofetu nevigeza nege'za, zimagesama antahizana hankrore nehu'za zamagogo hu'za krafa hu'naze. <sup>50</sup>Na'ankure makamo'za nege'za zmagogogu hu'naze. Hianagi hantaka huno anage huno zmasami'ne, Nagragi oti hanavenetita, korora osiho. <sup>51</sup>Anage huteno mani'naza ventifi marerigeno, zaho'mo amane nehigeno tusiza hu'za antri hu'naze. <sup>52</sup>Na'ankure bretima tamanasino zami'nea zamoyo agafa'a, ke so'e osazageno zmaguamo hanavetine.

**Jisasi'a Genesareti kaziga kri veamokizmi zamazeri so'e hu'nea naneke**  
(*Mat 14:34-36*)

<sup>53</sup>Hanki kantu kaziga takahe'za Genesareti mopare uhanati'za, ventea kina rentete'za, <sup>54</sup>ventifinti atineramizageno'a, vahe'mo'za ame hu'za Jisasi'e hu'za ke'ama nehu'za, <sup>55</sup>zamaga re'za vu'za e'za hu'za, ana kazigama me'nea kuma tamimpinti kri vahetamina sesenku hu'za zmarente'za, Jisasi'a mani'ne haza kumate vu'naze. <sup>56</sup>Hagi ina osi kumatero rankumatero, hozafi kiza maninaza kumapino, Jisasima virega kri vahera zamavre'za maketi kumapi ome zmantene'za, knare tataresanketa zaza kena kamoyo atupare azerigahunu huza antahinege'za, kukena'arema avakoma hazamo'za, kri zmimo'a vgarene.

**Anumzamoyo kemo vahe'moyo kea agaterenea naneke**  
(*Mat 15:1-9*)

**7** <sup>1</sup>Hagi Farisi mono vahe'mo'zane kasere ugagota hu'naza vahe'mo'za Jerusale kumateti' e'za, Jisasinte emeri atru nehu'za, <sup>2</sup>Jisasi amage'ma nentaza Disaipol naga'mo'za zmazana sese osu'za bretia nenage'za ke'naze. <sup>3</sup>Na'ankure Farisi vahe'ene, mika Jiu vahe'mo'za, zmagehe'moyo zamavu zmavama avaririza, zamazana sese huso'e osune'za ne'zana nonaze. <sup>4</sup>Maketi kumapinti ne-e'za, zamagra ne'zana onene'za zmazana sese hute'zage ne'zana nenaze. Hagi zamagra rama'a zmagehemoyo kasegea eri'naze, kapuma kavoma tinkavoma nezama anteno ne' zamtamima sesehu agruma hute'za, ne'zama ne'zana azenerize. <sup>5</sup>Hagi Farisi vahe'mo'zane, kasere ugagota hu'naza vahe'mo'za Jisasi antahige'za, nahige'za kamagama nentaza disaipol vahekamo'za tagehe'i avu'avamoyo kea amage onte'za, ne'zama nenakura zmazana sese nosaze? <sup>6</sup>Jisasi'a anage huno zamasmine, Aisaia'a fatgo huno krunage vahere huno krenteneana, tmagriku hu'ne, *Ama vahe' mo'za zamagititi nagi hentesga nehaze, hianagi zmaguamo'a*

*nagritera omaneno, afete'are me'ne.* <sup>7</sup>*Amegati nezama'a omane mono hunenante'za, vahe'mofo kasege rempi nehaze.* (Aisa 29:13)

<sup>8</sup>Anumzamoma hiho hu'nea kasegea netretma, vahe'mofo zmuzma'mofo ke azeri hanavetita amage nentaze. <sup>9</sup>Anage huno mago'ane zmasami'ne, Anumzamomofo kasegema eritre kaziga knare hu'naze. Hanki tamagehe'i avu'ava'mofo amagera nentaze. <sup>10</sup>Na'ankure Mosesi'a anage hu'ne, Negafane negreranena antahiminka agoraga'a manio, hagi iza'o nefama nererama agoraga'a omanino, huhaviza hunesimofona, ahe friho hu'ne hutma nehaze. <sup>11</sup>Hianagi tamagra anage nehaze, aza'o nefama nerera asamino, nagrama tanaza hu'zama ante'noana, Anumzamomofo ami'naku ante'noe huta nehaze. <sup>12</sup>Ana nehutma, ana ne'mofona atrageno nefane nereranena mago'zana aza nosie. <sup>13</sup>Tamagri tami tmavu tmava'za rempima huzamiza'zamo Anumzamomofo ke'mofo hanavea eri netreta, rama'a ama anahu'zana nehaze.

**Vahe'mokizimi zmazeri pehena nehia zamomofo naneke**  
(*Mat 15:10-20*)

<sup>14</sup>Maka veaku Jisasi'a ke hige'za ageno anage huno zamasmi'ne, tamagra nanekeni'a nentahita antahi ama hiho. <sup>15</sup>Magore huno fegiatima vahemomofo agu'afima ufresiazamo'a, azeri pehena osugahie. Hianagi vahe'mofo agu'afinti atiramino esiazamo, azeri pehena hugahie. <sup>16</sup>[Kagesa antahinamoka antahio.] <sup>17</sup>Anage huteno, ana vahe zamatreho Jisasi'a nompimrenerige'za, amage'ma nentaza disaipol naga'mo'za, ana fronka ke'mofo agafa'agu antahige'naze. <sup>18</sup>Jisasi'a anage huno zmasami'ne, tamagrira knare antahizana omane'nefi? Tamagra antahi amara nosazo, nankanzamo'ma fegiatima vahe'mofo agu'afinka ufrezamo'a, vahe'mofona zmazeri pehena nosie. <sup>19</sup>Na'ankure anazamo'a tumopina novie. Hanki rimpafi uramiteno, anantetira rifa kerifi nevie. (Jisasima anagemahu'nea kemo'a, mafka ne'zamo'a agru hu'ne.) <sup>20</sup>Jisasi'a anage huno zmasamine, vahe'mofo zmaguafinti atiramiazamo, zmazeri pehena nehie. <sup>21</sup>Vahe'mofo agu'afintima efore'ma nehiana, havi agu'agesa antahizane, monko avu'ava'zane, kumzafa se'zane, vahe ahe frizana ne-e, <sup>22</sup>arave hu'nea a'ene vene monko avu'ava hu'zane, agraguke antahizane, havi avu'ava'ene, vahe'mofo krunage hunte'zane, vahe'mofo kumipi avrente avu'avazane, vahe'mofo zanku kenunu hu'zama, knare vahe'mofo havige hunte'zane, neginagi avu'ava hu'zane, avufga eriantesga hu'zane, <sup>23</sup>ana mafkazana vahe'mofo agu'afinti atiramiazamo vahera azeri pehena nehie.

**Mago a'mo Jisasinte amentinti hu'nea naneke**  
(*Mat 15:21-28*)

<sup>24</sup>Jisasi'a otino ana mopa atreno Taia kuma kaziga vu'ne. Vuno mago nompimufreno, vahe'mo'za emenine huza ontahisaze nehuno umanine,



hianagi frakigara osu'ne. <sup>25</sup>Ana hianagi mago mofara havi avamumo agu'afi fre'nea mofa'mofo nerera'a Jisasi'ma emani'nea ke nentahino, ame huno eno agafi eme prihuno, <sup>26</sup>ana ara Sairofonesia kuma Griki meg'i'a vahepinti a'kino, Jisasinku muse hugantoanki havi avamura ome hunto huno asami'ne. <sup>27</sup>Jisasi'a anage huno ana aku hu'ne, mofavremomo Bretima erita kramofo amizamo'a knarera osu'neanki, atregeno mofavremo kotazana nemu huteno. <sup>28</sup>Ana a'mo'a anage hu'ne, Ramoka tamage hananagi, itaretima mofavre'mo'za nenazageno, ankrama hermiam'a kramo'za zogi'za ne'naze. <sup>29</sup>Anante Jisasi'a anage hu'ne, e'inhau kenona hanku vuo, havi avamumo'a mofaka'amofa agu'afinti hago atiramino vu'ne. <sup>30</sup>Higeno noma'arega vuno ome keana, mofa'amofona havi avamumo ko atreno vigeno, sipare mase'negeno ome ke'ne.

**Agesa anari neregeno ageru noria ne' Jisasi'a azeri knamare'nea naneke**

<sup>31</sup>Anante Jisasi'a Taia kumara atreno, Saido kumapinti rugitagino Dekapolisi kaziga, Galili tirutega uhanatige'za, <sup>32</sup>mago agesa ankani neregeno kea nosia ne' avare'za e'za, Jisasinku muse hugantonanki kazana agofetu anto hu'naze. <sup>33</sup>Jisasi'a veara nezmatreno ana ne' avareno znagrake umanine'ne, agesa gampi azana nevazino, avetu aheno azankonu aganefunare avako nehuno, <sup>34</sup>kesga huno monafi negeno ra asimu nenteno, Efata huno hu'ne, (ana kemofa agafa'a ruhagro huo hu'ne.) <sup>35</sup>Ame huno ana ne'mofo agesamo'a ru hagro higeno, agefunamo'a oza higeno, knare huno kea hu'ne. <sup>36</sup>Jisasi'a amazama huazana vahera ozmasmiho huno nezmasamiana netre'za, ete mago'ane vahera huama hu'za zmasaminaze. <sup>37</sup>Hagi tusi zamagogo fege'za, Agra mika' zana knare'za nehie hu'za nehu'za, zamagesa anknire'naza vahe erinkro huzmantege'za, knare hu'za kea nentahize. Hagi zamagnefu'na kna hu'nea vahe zamazeri so'e hige'za knare hu'za kea nehze hu'za hu'naze.

**Jisasi'a 4tauseni'a vahetami ne'za zami'nea naneke**

(Mat 15:32-39)

**8** <sup>1</sup>Ana knafi mafka vea mago'ene eritru hzageno, ne'zana omanegen, Jisasi'a amage'ma nentaza disaipol naga ke hige'za ageno anage huno zamasmine. <sup>2</sup>Nagra ama vea krerfagura nasunku huzmantoe. Na'ankure zamagra tagufa kna nagri'enena mani'zageno, ne'zana omane'ne. <sup>3</sup>Nagrama huzmantesuge'za kuma zimirega zmaga'ma netesige'za vanu'za, mago'amo'za afeteti e'nazankiza kantega utraka hugahaze. <sup>4</sup>Agri amage'ma nentza disaipol naga'mo'za anankemofa nona'a anage hu'za asami'naze, vahe omani mopafi mani'nonanki inantegati' ne'zana erizamisunke'za neganare hugahaze? <sup>5</sup>Hzageno Jisasi'a huno nama'a breti eri'naze? huno zmantahigege'za, 7ni'a breti eri'none, <sup>6</sup>hzageno, Jisasi'a ana maka veara mopafi maniho huno

zmasamige'za manizageno, 7ni'a breti erino Anumzamofu susu hunteteno, tamanasino amage'ma nentaza disaipol nagara zmige'za ana veara refko hu'za zami'naze. <sup>7</sup>Ana nehzageno onensa nozamene mago'a me'negeno erino Anumzamofu susu hunteteno, amagemata nentazana disaipol nagakura eritma zamiho huno zamasmine. <sup>8</sup>Maka vahe'mo'za ana ne'za nenageno zamu hige'za ankra'ama atrazama'a, amagemata nentaza disaipol nagamo'za 7ni'a ra eka eka kupi zogiri avite'naze. <sup>9</sup>Ana vahera 4tauseni'a vahe nazamo'za netageno, huzmantege'za vu'za e'za hu'naze. <sup>10</sup>Jisasi'a anama huteno, ame huno amage'ma nentaza disaipol naga'ane ventefi mareri'za Talmanuta kaziga vu'naze.

**Farisi vahe'mo'za Jisasinku avame'za huraverio hu'za hu'naza naneke**  
(*Mat 16:1-4*)

<sup>11</sup>Anante Farisi vahemo'za e'za Jisasinku ke hakare hu'za, monafinti ruzahu hankave'za erifore hugeta kamneno huza rehe'za ke'naze. <sup>12</sup>Jisasi'a rimpamo kna nehigeno anage hu'ne, Na'a hige'za meni knafi vahe'mo'za avame'za kenakura nahaze? Nagra tamage hu'na neramasamue, mago avame'zana ama knafi vahe'mo'za onkegahaze. <sup>13</sup>Ana huteno zamatreto ete ventefi marerino kantu kaziga vu'ne.

**Herotina Farisi vahe'mokizmine havige kemofonku, zistire hunteno zmasami'nea fronka naneke**  
(*Mat 16:5-12*)

<sup>14</sup>Hagi amage'ma nentaza disaipol naga'mo'za zmagekani'za bretia eri'za omazanagi, magoke bretige ventefina me'nege'za vu'naze. <sup>15</sup>Nevzageno Jisasi'a huno, Farisi vahe'mokizmi zistigu'ene kini Heroti zistigura kva hiho. <sup>16</sup>Hige'za zmagra zmagra ke huge antahige hu'za bretima erita ome'nonazanku nehugahie hu'naze. <sup>17</sup>Nehazageno Jisasi'a antahino keno nehuno, nahigeta breti omane'nea zankura huge antahige nehaze? Tamagra ketma antahi amara osu'nazafi? Tamagri tmagu'amo'a eriginefi? <sup>18</sup>Tamavurga me'neana ke so'e nosazafi? Tamagesama me'neana antahi so'e nosazo? Tmagrira tamage'kaninegahie. <sup>19</sup>Ko'ma 5fu'a breti tamanasina, 5 tauseni'a vahe zami'noge'za nene'za atrazama'a, nama'a eka eka kupi erivite'naze? 12fu'a eka eka kupi zogiri'none hu'naze. <sup>20</sup>Hagi 7ni'a bretireti tamnasi'na 4tauseni'a vahe zami'noge'za nene'za atrazama'a, nama'a eka eka kupi zogiri avite'naze? Hige'za 7ni'a kupi zogiri'none hu'za hu'naze. <sup>21</sup>Anante Jisasi'a anage huno zmasami'ne, e'ina'ma hu'noazankura menina tamagra tamagesa antahi'ama nosazafi?

**Jisasi'a avusu hu'nea ne' azeri hari hunte'nea naneke**

<sup>22</sup>Zamagra Bedsaita kumate azageno, mago'a vahe'mo'za avusu hu'nea ne' avare'za Jisasinte e'naze. Avurgare avako hinkeno so'e huntenu

hanaveti'za Jisasi antahigene'naze. <sup>23</sup>Ana nehzageno, Jisasi'a avusu hu'nea ne'mofo azante avazu huno kumara atreno megi'a vuteno, Jisasi'a avufi avetu ahenenteno, azanu avako nehuno, mago'azana negano? Huno antahigene. <sup>24</sup>Kesga huno avua negeno, vahera vano nehazagena zmagoanagi, zafamo vano nehiaza nehigene'na nezmago'e huno hu'ne. <sup>25</sup>Anante Jisasi'a mago'ene azanu avurgare avako higeno, ana ne'mofo avurgamo'a hari higeno, ke ankereno negeno maka'zana keama huno ke'ne. <sup>26</sup>Anante Jisasi'a hunenteno, kumapina ufrege efrege osunka, fatgo hunka nonkarega vuo huno asami'ne.

**Pita'a huama Jisasinku hu'nea naneke**

*(Mat 16:13-20, Luk 9:18-21)*

<sup>27</sup>Jisasi'a amage nentaza disaipol naga'ane Sisaria Filipai kumatamimpi vu'naze. Kantegama nevu'za Jisasi'a anage huno zmantahigene, Nagrikura vahe'mo'za iza'e hu'za neheze? <sup>28</sup>Mago'amo'za, hu'za mono ti frezamante'nea Joni'e hu'za nehze. Hagi mago'a mo'za, kasnampa ne' Ilaija'e hu'za nehze. Hagi mago'amo'za korapa kasnampa vahepinti mago'zmimo'e hu'za neheze. <sup>29</sup>Anage hzageno Jisasi'a zamagri zmantahigeno, hagi tamagra iza'e hutma Nagrikura neheze? Higeno Pita'a kenona huno, kagra Kraisige, Anumzamo'ma huhamprino vahe'ama z mavregahanema hu'nea nere hu'ne. <sup>30</sup>Agra hu hankavetino mago vahera ana naneke huama hutma ozmasmiho huno zamasmine.

**Jisasi'a knafima ufreno frisia ke zamasmine naneke**

*(Mat 16:21-28, Luk 9:22-27)*

<sup>31</sup>Anante Jisasi'a erigafa huno amage'ma nentaza disaipol naga'a rempi huzamino, Vahe'mofo Mofavremo'a rama'a ata e'nerisigeno, mono kva vahe'mo'zane, ugagota kva vahe'mo'zane, kasegere ugagota hu'naza vahe'mo'za zmefi humiza ahefrisageno, tagufagna maseteno otigahie huno zmasami'ne. <sup>32</sup>Huama huno amate zmasamigeno, Pita'a nentahino Jisasina avaregantiteno, agafa huno e'inahu kea osuo huno kesu'ne. <sup>33</sup>Hianagi Jisasi'a rukrahe huno, amage nentaza disaipol nagatega nezmageno Pitana kesuno, Sataga manigenka namefiga'a evuo, Anumzamofa antahintahi novaririnanki, vahe'mofo antahintahi nevaririne.

**Jisasi amage'antezamofa naneke**

<sup>34</sup>Anante Jisasi'a maka veamokizmi ke hige'za, amage'ma nentaza disaipol naga ene emetru hazageno, anage huno zmasami'ne, mago vahe'mo nagri namage'ma antenaku'ma hanuno'a, agra'a avesizana netreno, keka zafa'a erigofino namage egahie. <sup>35</sup>Na'ankure iza'o, agra'a manizama'a eri so'e huku hanimo'a, asimu'a atregahie. Iza'o nagriteku'ene knare musenkere'ma asimu'a atresimo'a,

manizama'a erigahie. <sup>36</sup>Mago vahe'mo'ma ama mopafi fenoza eri atruma nehanigeno, agu amema'a fnanema haniana, nankna aza hu'za erigahie? <sup>37</sup>Na'a vahe'mo'a asimuma erisigura nona'a huno Anumzamofona amigahie? <sup>38</sup>Iza'o ama knafi keontahi kumike vahepi, Nagriku'ene Nanekenimofa agaze huntessimofona, henka Vahe'mofo Mofavremo Nfa'amofa hanavefima routge ankeri vahe'ane esuno'a, Agranena zamagaze hunte'nesamokizmia, eme agaze huzmantegahie.

**9** <sup>1</sup>Jisasi'a mago'ane zmasamino, tamage hu'na neramasmue, amafi otiza mni'naza vahepintira, ofri mani'ne'za Anumzamofa kumamo'a hanave'ane esige'za kegahaze.

**Jisasi avufgamo masantake nehige'za kenaza naneke**  
(*Mat 17:1-13, Luk 9:28-36*)

<sup>2</sup>Gsi'a zagegna evutegeni, Jisasi'a, Pitama, Jemisima, Jonikizmia zmvreno za'za agonafi mareriza zamagrake umani'ne'za, negageno avufagamo'a rukrehe huno ruzahie nehigeno, <sup>3</sup>kukena'amo efe anentake huno tampre tampre hu'ne. Mopafina kukena sese nehigeno e'inahukna efenentake nosiaza huno efenentake hu'ne. <sup>4</sup>Hagi Ilaija'a Mosesi'ene zmvvuga efore huke Jisasi'ene naneke hu'naze. <sup>5</sup>Ana higeno Pita'a anage huno Jisasina asami'ne, Hurami' nemoke, knare amafina mani'none. Hagi tagufa tona nona kigahune, mago nona Kagriki, mago nona Mosesinki, mago nona Ilaijanki huta kigahune. <sup>6</sup>Na'ankure zmagra tusi koro nehazageno, na'ane naneke hugahie, Pita'a ontahineno ana kea hu'ne. <sup>7</sup>Anante hampomo refitenezmantegeni, mago agerumo amanage ana hampopinti hu'ne, ama'i tusiza hu'na navesima nentoa Mofavreni'e. Agrama hania kea antahi amiho! <sup>8</sup>Keganti kegma hu'za kazana, ame huke Moseke Ilaijake omninakeno, Jisasi Agrake mani'nege'za ke'naze.

<sup>9</sup>Zamagrama agonaregati magoka eneramizageno hanave ke zmasamino, ke'naza zana vahera ozmasamitfa hu'nenkeno, Vahe'mofo Mofavremo'a, fripinti otiteno hu'ne. <sup>10</sup>Zamagra'a fritena otitanenoma hia naneke nentahiza, na agu'agesare nehie hu'za hu'naze. <sup>11</sup>Anante zmagra Jisasina anage hu'za antahige'naze, na'a hige'za kasegere ugagota hu'naza vahe'mo'za, hu'za Ilaija'a etenkeno'e hu'za nehaze? <sup>12</sup>Jisasi'a anage huno zmasami'ne, Tamage Ilaija ko eno maka'zama haviza hu'neazana eriso'e hu'ne. Hagi na'a higeno avontafepina krenteno, Vahe'mofo Mofavremo'a rama'a ataza erina, vahe'mo'za zamefi humigahaze hu'ne?

<sup>13</sup>Hianagi anage hu'na neramasamue, Ilaija'a ko' ehanatige'za nanknazama hunte'nakuma haza'zana avon tafepima kre'nea kante ante'za maka'zana hunte'naze.

**Jisasi'a mago mofavre azeri knamre'nea naneke**  
(*Mat 17:14-21, Luk 9:37-43*)

<sup>14</sup>Jisasi'ene tagufa amage'ma nentaza disaipol nagamo'zama, ete ruga'a amage'ma nentaza disaipol nagatema, e'za eme zmagazana kasegere

ugagota hu'naza vahe'mo'za keha renezmantazageno eme zmage'naze. <sup>15</sup>Ana maka vahe'mo'za Jisasina nege'za antri nehu'za, ame hu'za zmagare'za vu'za muse ome hunte'naze. <sup>16</sup>Jisasi'a huno na'anuku huge antahige zamagranena nehaze huno zmantahige'ne? <sup>17</sup>Tusi'a vahepinti mago'mo ana kemofono nona'a anage hu'ne, Rempi hurami ne'moke, havi avamumo agu'afi mani'nenono agira eri antrako higeno, ke nosia mofavreni'a avarena Kagrite neoe. <sup>18</sup>Anama havi avamumo agu'afi nefreno'a azeri traka hutregeno mopafi masenegeno, ahirahi neregenono agipinti agremono zuzu nehigeno, avera anikreki nehuno mase havavu nehie. Ana nehigena avre'na Kagri kamage'ma nentaza disaipol nagate havi avamu humegi atresazegu zmantahigo'anagi, azeri so'e huonte'naze. <sup>19</sup>Ana kemofono nona'a Jisasi'a anage huno zmasami'ne, tamagra tamentinti osu vahere! Nama'agna tamagra nena manigahue? Nama'agna tmagri kna erina vugahue? Ana mofavre avaretma Nagrite eho. <sup>20</sup>Hagi ana mofavre avare'za azageno, havi avamumo Jisasima anama negeno'a, ana mofavre azeri traka hutregeno mopafi traka huno maseno rukre rukre nehigeno, agipinti agremono zuzu huramine. <sup>21</sup>Ana nehigeno Jisasi'a ana mofavremofono nefana antahigeno, Nanknafi ana zana agafa hu'ne? Higeno, mofavre maninegenono anazana fore humine huno hu'ne. <sup>22</sup>Rama'a zupa tevefine tirupine ahefri'naku azeri traka hunetre. Hagi Kagrama azahuga hunesunka, kasunku hurantenka taza huo huno hu'ne. <sup>23</sup>Jisasi'a anage huno ana mofavremofono nefana asami'ne, na'a higenka kagrama azahuga hunesunka azeri otio hunka nehane? Hagi mago'moma amentinti huno, maka'zana fore hugahie hanimofontera, amane maka'zana fore hugahie. <sup>24</sup>Ana mofavremofono nefa'a ranke hantka huno anage hu'ne, namentinti huanki namentintima osu'zana naza huo! <sup>25</sup>Jisasima keama rama'a vahe'mo'za ame hu'za eritru nehazageno, havi avamura hanavetino hunteno, kagra vahe'mokizmi zmazeri negi nenenka zamagi zamazeri antrako nehana havi avamumoka, hugantoanki agu'afintira atiraminka nevunka, mago'anena eofro.

<sup>26</sup>Higeno ranke huno azeri tagosi tagosi nehuno atiramino enevigeno, ana mofavremo fri vahekna huno mase'nege'za, hago frine hu'za hakare vahe'mo'za sumi sumi ke hugantigama hu'naze! <sup>27</sup>Hianagi Jisasi'a azante akoheno azeri otigeno oti'ne. <sup>28</sup>Ana huteno Jisasi'a nompni umarerige'za, amage'ma nentaza disaipol naga'mo'za, Agrane zamagraku umani'ne'za, na'a higeta havi avamura ahenati notrone hu'za antahige'naze? <sup>29</sup>Jisasi'a anage huno zmasami'ne, amana huknazana, nunamuhu kantetike huntisageno atiramigahie.

**Jisasi'a friteno otisia zamofonku hu'nea naneke**

*(Mat 17:22-23, Luk 9:43-45)*

<sup>30</sup>Jisasi ene amage'ma nentea disaipol naga'mo'za ana kumara atre'za, atiramiza Galili kaziga rukitagiza vu'naze. Hianagi Jisasi'a kama

vazama'a mago vahemo antahi zankura ave'osine. <sup>31</sup>Na'ankure amage'ma nentea disaipol nagara rempi hunezamino, anage huno zmasami'ne, Vahe'mofo Mofavre avare'za ha' vahe zmazampi antesageno ahe frina, tagufa kna maniteno kerifintira otigahie. <sup>32</sup>Hianagi ana naneke antahi ama nosu'za, antahige'zankura koro hu'naze.

**Amu'nontifina i'za rana mani'ne hu'naza naneke**

*(Mat 18:1-5, Luk 9:46-48)*

<sup>33</sup>Ananteti Kapanea kumatega ete'za, Jisasima nompinka enemanino'a anage huno zmantahige'ne, Kantegama ne-eta na'anuku keaga huta e'naze? <sup>34</sup>Hianagi kantegama ne-eza i'za amu'nontifintira ugagota hu'ne hu'za hugantugama hu'nazagu, zamagra kea osutfu hu'naze. <sup>35</sup>Anante'ma Jisasi'ma mopafima nemanino 12fu'a amage'ma nentaza disaipol naga'a, kehuno anage huno zmasamine, iza'o ugagota hunaku'ma hanimo'a, henkarfa nemanino, maka vahe'mofo eriza vahe manigahie. <sup>36</sup>Agra osi mofavre amunozmifi azante azerino azeri onetino, anage huno zmasami'ne. <sup>37</sup>Iza'o amanahu'kna osi mofavre, Nagri nagifi avreno azeri so'e huntesimo'a, Nagri navareno nazeri so'e hunantegahie. Iza'o Nagri'ma nevareno nazeri so'e hunante'nimo'a, Nagrike navreno nazeri so'e osugahianki, Nenfa hunantege'na e'nomofo avreno azeri so'e huntegahie.

**Erizanti eri haviza nosimo'a tagri kaziga mani'ne hu'nea naneke**

*(Luk 9:49-50)*

<sup>38</sup>Joni'a Jisasi asamino, Hurami ne'moka mago ne'mo kagri kagifi havi avamutamina humegi netregeta negeta, ana osuo huta hunte'none. Na'ankure ana ne'mo'a tagranena vano osu'negu ana osuo huta asevizinte'none. <sup>39</sup>Hianagi Jisasi'a anage hu'ne, i'o huonte'ho, na'ankure mago vahe'mo'e huno Nagri nagifima kaguvazama nehanimo'a, hantga huno hu haviza hu onantegahie. <sup>40</sup>E'ina hu'negu iza'o tagri'ma ha'marema norante'nimo'a, tagri kaziga mani'ne. <sup>41</sup>Na'ankure tamage hu'na neramasamue, iza'o, Kraisi amage'ma nentaza disaipol naga zmaza hanue huno nehuno, tima afi tamisimofona, mizama'amo'a fanane osugahie.

**Havi avu'avazamo zmentinti zmazeri haviza nehia naneke**

*(Mat 18:6-9, Luk 17:1-2)*

<sup>42</sup>Jisasi'a anage huno zmasamine, iza'o ama osi mofavremo'za, Nagrite zmentinti nehaza mofavre naga kumipi zmarentesamokizmia, tusi'a monu havereti anankempi rentete'za, hagerimpi matevu'za atresageno uramisiana knare'zantfa hugahie. <sup>43</sup>Hagi kzamo'ma kumipi kavare nentesigenka akafritro, na'ankure ru tare kaza me'nenno asu osu tevava tevefi kavarente zanku, magoke kaza me'nena manivava asimu erizampi ufresanana knare hugahie. <sup>44</sup>[Anampina knimo'a zamufgafi manivava

hugahie. Hanki tevemo asu osu tevava hugahie.] <sup>45</sup>Hagi kagamo'ma kumipi kavare nentesigenka akafri tro, na'ankure ru tare kaga me'nenos asu osu tevava tevefi kavarente'zanku, magoke kaga me'nenos, manivava asimu erizampi ufresanana knare hugahie. <sup>46</sup>[Anampina knimo'a zamufgafi manivava hugahie. Hanki tevemo asu osu tevava hugahie.] <sup>47</sup>Hagi kavurgamo'ma kumipi kavare nentesigenka, tagati atro, na'ankure ru tare kavurga me'nenos, asu osu tevava tevefi kavretre'zanku, magoke kavurgama me'nenos, Anumzamofos kumapima ufresanana knare hugahie. <sup>48</sup>*Anampina knimo'a zamufgafi manivava hugahie. Hanki tevemo asu osu tevava hugahie.* (Ais 66:24) <sup>49</sup>Na'ankure ana mikomofona tevenu kre fatgo hugahie. <sup>50</sup>Hagemo'a knare hu'neanagi, haga'ama atresigenka, inankna hunka ete kagra eri haga hugahane? Tamagra hagegna huta amunos tamifina ovesinte avesinte hutma maniho.

**Jisasi'a arave atane zanku zmasami'nea naneke**  
(*Mat 19:1-12, Luk 16:18*)

**10** <sup>1</sup>Jisasi'a anankuma atreno Judia kaziga vunos Joda ti takahenos kantu kaziga vu'ne. Nevige'za tusi'a veamo'za mago'ene Agrite emeris atru hzagenos anante umani'nenos, ko'ma nehiazas hunos naneke mago'ene agafas hunos rempi huzami'ne. <sup>2</sup>Farisi vahe'mo'zas e'zas Jisasinas rehe'zas anage hu'zas antahige'nazes, vemomas nenaros atrezamo'a kasege amage antegahifi? <sup>3</sup>Ana kenona'a anage hunos zmasami'ne, na'a hiho hunos Mosesi'a kasegea krerami'ne? <sup>4</sup>Zamagra anage hu'nazes, Mosesi'a avompinas, vemo'a nenaros atrenakuras amane katros hunos eriamahu avonas kre neminos, huntekenos vugahie. <sup>5</sup>Hianagi Jisasi'a amanage hunos zamasmis'ne, na'ankure tmarimpamo'a hankavetinos erigi'neazanku hunos Mosesi'a anas kasegea krenos tamamis'ne. <sup>6</sup>Hianagi Anumzamos eses agafares *vene a'ene trohu znante'ne*. <sup>7</sup>E'i anas agafares vemo'a nefanes nererananas netrenos, nenaros'enes hagerfinos, (Diu-Kas 24:1, Jen-Agf 1:27, 5:2) <sup>8</sup>erimagos znavufas neseke, mago'anes tare vaheras omnina'anakis, magoke manis'ne. <sup>9</sup>E'inas hu'negus nazanos Anumzamos eris hagerafis neniazanas, atregegos magos vahe'mo'a eris ovasanenos. <sup>10</sup>Etes mago'enes nompis umareris'zas amage'mas nentazas disaipol naga'mo'zas aravemas refutagizankuras antahige'nazes. <sup>11</sup>Jisasi'a ke'nonas zamires anage hunos zmasamis'ne, iza'o eses a'mas netrenos aru a'mas erisas ne'mo'a, eses a'mofonas kumis huntenos monkos avu'avazas hugahie. <sup>12</sup>Hagi magos a'momas neves netrenos, aru ves eris snimo'a, monkos avu'avas hugahie.

**Jisasine ne'one mofavre naga'mofos naneke**  
(*Mat 19:13-15, Luk 18:15-17*)

<sup>13</sup>Anante vahe'zgamo'zas ne'one mofavres raminas Jisasi azantenos asomus huzmantenogus zmavares'zas neage'zas, amage'mas nentazas disaipol

nagamo'za ke zmasu'za azeri amuho osiho hu'naze. <sup>14</sup>Hianagi Jisasima nezmageno asi vazigeno, anage huno zmasami'ne, zamazeorita zmatrenke'za osi mofavre'mo'za Nagrite eho, na'ankure Anumzamofokumara e'inahu vahe'mofo kuma me'ne. <sup>15</sup>Tamage hu'na neramasamue, iza'o Anumzamofokumama mofavre'moma eneriaza huno e'orisimo'a, uofretfa hugahie. <sup>16</sup>Jisasi'a anage huteno, ana mofavre'rami zamavreno, azana zmagofetu anteno agafa huno asomu ke huzmante'ne.

**Afufeno ne'mo Jisasi antahige'nea naneke**  
(*Mat 19:16-30, Luk 18:18-30*)

<sup>17</sup>Jisasi'a otino kantega nevigeno mago ne'mo negeno, agareno agafi rena omenereno anage huno hu'ne, knare rempi hurami ne'moka, nankna hanuna manivava asimura erigahue? <sup>18</sup>Higeno Jisasi'a anage huno ana nera asami'ne, na'a higenka kagra knare hu'nane hunka nehane? Mago vahe'mo'e huno knare osu'neanki, Anumzamo Agrake knarera hu'ne. <sup>19</sup>Hagi kasegefina ko amanage hu'negenka antahinane, vahe ahe ofrio, rumofo a'enena monko'zana osuo, kumzafa oso, vahera havige huozmanteho, vahezana eri savarira osiho, negrerane negafane kea antahi znaminka znamage antegahane hu'negenka antahinane. <sup>20</sup>Anante ana ne'mo Jisasina anage huno asami'ne, Hurami ne'moka, osi'ma maninoreti, nagu'areti hu'na maka ana kasegea amage ante'noe. <sup>21</sup>Jisasi'a ana nera negeno avesinteno anage hu'ne, mago'zanku upa hu'nane, vunka inanknazama ante'nesnana zana, maka zagore ome atrenka eritenka, ana zago erinka zamunte omene vahe nezamigeno, monafi fenonka'a meno. Ana nehunka kagra, Nagri eme namage'anto. <sup>22</sup>Ana naneke nentahigeno, avugosamo ruzahie higeno, rama'a afufeno ante'negu rimpagna nehuno atreno oti'no vu'ne.

<sup>23</sup>Vigeno Jisasi'a ome zmage eme zmage nehuno, amanage huno amage'ma nentaza disaipol naga'a zmasmi'ne, Afufeno zmine vahe'mo'za Anumzamofokumapi ufrenaku'ma hanazana, tusi'a amuho hugahaze! <sup>24</sup>Amagemanentaza disaipol nagamo'za antri ana kegura hu'naze. Hianagi mago'ene Jisasi'a anage huno zmasami'ne, mofavre naga'mote, Anumzamofokumapima ufrezamo'a tusi'a amuho hu'ne! <sup>25</sup>Kemoli afumo'za nekazamofokampima ufrenakuma nehazana amuhoa hunozmante, hianagi afufenone vahe'moza Anumzamofokumapi ufre'naku hanazana, tusi amuho huzmantegahie. <sup>26</sup>Mago'ene antri hu'za tusi zmagogogu nehu'za, zamagra zmagra anage hu'naze, hagi iza manivava manizana erigahie? <sup>27</sup>Jisasi'a nezmageno ana kenona amanage huno hu'ne, Vahe tfamota amanahu'zana hugara osu'nazanki, Anumzamo'a amane maka'zana hugara hu'ne.

<sup>28</sup>Pita'a anage huno Jisasina asmi'ne ko, tagra mafka'zana atreta kagri kamage'entone. <sup>29</sup>Jisasi'a anage hu'ne, tamage hu'na neramasamue,



iza'o Nagriku ene knare muse kereku'ma huno nozmifi, afuhe'impfi, asarhehe'impfi, nererampfi, nefampfi, mofavre'zga'afi hoza ramima'ama atresimo'a, <sup>30</sup>ana nona'a maka'zana 100ti'a agatere'za menina ama knafina rama'a e'neriza, rama'a kuma'ene, nefu'zane nesaro'zane nererane mofavre' naga'ane, hoza zmine e'nerisage'za, vahe'mo'za zmazeri haviza nehanige'za, henkama esia knarera manivava zmasimu erigahaze. <sup>31</sup>Hianagi rama'amo'za ugagota hu'nenamo'za, henka esnage'za, rama'a henka e'nenamo'za, ugagota hu'za vugahaze.

**Ete tagufa zupa Jisasi'a friteno otisia zanku hu'nea naneke**  
(*Mat 20:17-19, Luk 18:31-34*)

<sup>32</sup>Jerusale vu kantega mareri'za nevazageno, Jisasi'a ugota huno vu'ne. Hianagi amagama nentaza naga'mo'za antri nehzageno, zmavaririza vu'naza vahe'mo'za koro hu'naze. Hianagi Jisasi'a 12fu'a amage'ma nentaza disaipol nagara zmare kanti mago'ene zmanteno, agafa huno agritema fore haniazamofa naneke zmasami'ne. <sup>33</sup>Keho, Jerusale kumate marerita meni nevunankino, Vahe'mofo Mofavrea azeriza ugagota mono kva vahete'ene kasegere ugota hu'naza vahe zmazampi avrentegahaze. Zamagra ahe friho nehu'za, fegi'a vahe zmazampi avrentegahaze. <sup>34</sup>Ana vahe'mo'za huhaviza hunente'za, zmavetu ahenente'za sefunemiza, ahe frigahaze. Hianagi tagufa kna agetere'sigeno frinefintira otigahie.

**Jemisike Jonike kota vahe maninaku Jisasina antahige' na'a naneke**  
(*Mat 20:20-28*)

<sup>35</sup>Anante tare Zebeti nemofoke Joni'ene Jemisike Jisasinte e'ne anage hu'na'e, Hurami ne'moka, menima tagrima tave'manesiza hurantogu kantahinego'e? <sup>36</sup>Jisasi'a anage hu'ne, na'a huranantesuegu neha'e? <sup>37</sup>Anage huke asami'na'e, monafima hihamu hanaveka'afima kinima umaninunka tatregeno, mago'mo'a kazantmaga manina, mago'mo'a kaza hoga'a maninogu nehue. <sup>38</sup>Hianagi Jisasi'a anage huno znasami'ne, tanagra antahitna ketna osu na'azanku nantahinega'e! Tanagra nesua kapufintira negaha'o, hifi tima fresuaza hutna, tina fregaha'o? <sup>39</sup>Ana netremoke anage huke Jisasina asami'na'e, tagra amane negahu'e huke hakeno, anante Jisasi'a anage huno znasami'ne, Nagrama nesua kapufintira amane neta, tima frezama nehua tina fregaha'e. <sup>40</sup>Hu'neanagi nazantmaga mani'zane, naza hogama manizana Nagri'zana omane'ne, Anumzamo'ma huhampri zamanteno, retroma huzmanteno erigahazema hu'nea vahe'mo'za erigahaze.

<sup>41</sup>Anage nehige'za 10'a amage'ma nentaza disaipol naga'mo'za ana naneke nentahi'za, Jemisine Jonigizni agafa hu'za zmarimpa aheznante'naze. <sup>42</sup>Jisasi'a mika'amokizmi ke higeza ageno anage huno zamasmine, megi'a vahepinti kva vahere hu'za antahizamiza vahe'mo'za

ra vahe'zimi nemanizageno, iza'zo ra zmagima eri'za vahe'mo'za hanave z mireti zmagatere'za kegva hunezmantaze. <sup>43</sup>Hu'neanagi tamagra anahukna osugahaze. Hianagi iza'o ra vahe maninaku hanimo'a, tmagri amu'nompina eriza vahe manino. <sup>44</sup>Iza'o amuno tamifintima ugagota hurmante'nakuma hanimo'a, mika'motma kazo kazo eriza vahe manigahie. <sup>45</sup>Ana hu'negu Vahe'mofo Mofavre'mo enena, eri'za erintehogura ome'ne. Hianagi tamagri tmaza nehuno, Agra'a asimura atreno rama'mokizmi miza sezmantenaku e'ne.

**Avusu hu'nea ne' Batamias naneke**

*(Mat 20:29-34, Luk 18:35-43)*

<sup>46</sup>Zamagrama Jeriko kumate ehnatite'za, Jisasi'ene amage'ma nentaza disaipol naga'ene tusi'a veamo'za ana kuma atre'za nevazageno, Timeasi nemofo Batamiasi avusuhu ne'mo, kamofa ankenarega mani'nenno, azama hanagu meme hu'ne. <sup>47</sup>Ana ne'mo antahiana Nazareti Jisasi ne-e hia ke nentahino'a, agafa huno kezatino, Jisasiga Deviti nemofofa nagrira kasunku hunantenka nazahuo! <sup>48</sup>Rama'a vahe'mo'za kesu'za, kagra tagano hu'naze. Hianagi mago'ene kezatino, Jisasiga Deviti nemofofa nagrira kasunku hunanteka nazahuo! <sup>49</sup>Higeno Jisasi'a nevfintino utino, Ke hinkeno eno hige'za, zamagra ana avusuhu neku, kagriku ke nehianki krimpamo'a so'e nehinkenka otinka eno hu'za hu'naze. <sup>50</sup>Ana ne'mo zanra anakreku'a netreno ame huno otino Jisasinte e'ne. <sup>51</sup>Anante Jisasi'a anage hu'ne, na'a hugante'nuegu kavenesie? Hurami ne'moka, ete navu kenaku nehue. <sup>52</sup>Higeno, Jisasi'a anage huno asami'ne, kamentintimo kazeri so'e hianki vuo higeno, ame huno avurgamo'a ete hari higeno amage' avaririno kantega vu'ne.

**Jerusale kumapi Jisasi'a donki afumofa agumpi kini vahekna huno ufre'nea naneke**

*(Mat 21:1-11, Luk 19:28-40, Jon 12:12-19)*

**11** <sup>1</sup>Hagi Jerusale kuma tva'onte e'naze. Betfakene Betani Olive agonare me'nea kumate ne-eza, Jisasi'a tare amage'ma nenta'a disaipol netrena huznanteno, <sup>2</sup>anage huno znasami'ne, tanagra ugoteta antu kumapi vi'o. Kasefa donki vahe'mo'a agumpi omninenia kina arente nenigeta ome kenutna, nofira eri katufetna avazu huta e'o. <sup>3</sup>Hanki ana nehnakeno mago'a vahe'mo, na'a hu'naku nevre'e huno hinketna'a? anage hi'o, Ramofona eriza me'ne hutna hikeno, ame huno atrenketna avretna egah'e. <sup>4</sup>Huno huznantegeke karanka nevu'ne ome ka'ana, fegia nomofa kafante rente'nagene ome negene katufe'na'e. <sup>5</sup>Anante otinaza vahe'mo'za, na'a hunaku donkina katunefa'e hu'za znantahige'naze? <sup>6</sup>Jisasi'ma hu'nea kea nezmasmige'za, anante'ma otinaza vahe'mo'za knarere hu'za huznante'naze. <sup>7</sup>Anante ana kasefa donkina avre'ne Jisasinte ne-ene anakreku'zani zafi'ne ana donkimofa agumpi

tafevasi nentakeno, Jisasi'a ana agofetu manino vu'ne. <sup>8</sup>Mika veamo'za zaza anakre ku'zimi zafiza kampi vasiza nevu'za, mago'amoza zafa asina hozafinti akafri'za kampi tafe vasiza nevzageno, Jisasi'a ana tafete vu'ne. <sup>9</sup>Kote'za vaza vahe'mo'zane henkama aza vahemo'zanena amrara hu'za ranke hu'za muse hunente'za, ***tazahu nera, (hosanna) ramofo agifi ne-emofona asomu hutesnie!*** (Sam-Zga 118:25-26) <sup>10</sup>Nerafa Deviti nagapintima ne-emofonkura mrerisa Anumzamofona muse hunenteta, Tazahu ne'mofona agi'a hentesga hanune. <sup>11</sup>Anante Jisasi'a Jerusale kumapi vuno, ra mono nomp i ufreno maka'za ome kagino ke vgareteno, atiramino 12fu'a amage'ma nentaza disaipol naga'a zgemo kinaga segeno nezamavreno atreno Betani kumate vu'ne.

**Fiki zafamo raga'a oreno huno sifna hente'nea naneke**  
(*Mat 21:18-19*)

<sup>12</sup>Masete'za nanterana Betani kumara atre'za neageno, Jisasina aga ate'ne. <sup>13</sup>Fiki zafa'mofo asina ogamanu me'negeno negeno, nezama rente'nenigu kenaku eme ke'ne. Hianagi eme keana asinage me'negeno ke'ne. Na'ankure fiki zafa raga rentekna omane'ne. <sup>14</sup>Ana zafa mofonku anage huno hu'ne, mago'ene rga oresnanke'za veamo'za tagi'za onegahaze. Anage hige'za amage'ma nentaza disaipol nagamo'za ana naneke antahi'naze.

**Ra mono nomp i maketi nehaza vahe Jisasi'a zamahe fegi zmatre'nea naneke**  
(*Mat 21:12-17, Luk 19:45-48, Jon 2:13-22*)

<sup>15</sup>Jisasi'ene amagem a nentaza disaipol naga'ane Jerusale kumate uhnti'za, ra mono nomp i marerino, agafa huno maketima nehaza vahera zmahenati netreno, zagore netre'za miza nesaza vahe'mokizmi trara erikaha hunetreno, mani'ne'za maho nma zgore netraza tra enena erikaha hutrene. <sup>16</sup>Ana huteno feno zantamia mago vahe'mote hutma eritma ra mono nompina aru kitagita vuta eta osutf a hiho huno hu'ne. <sup>17</sup>Ana huteno agafa huno rempi hunezamino anage huno zamasm i'ne, amanage huno Anumzamof o avontafepina krente'ne, *Nagri nona mika kaziga vea'moza nunamu hanaza no me'ne*, hianagi tamagra kumzafa vahe'moza fraki nonkuma eri tro nehaze. (Aisa 56:7, Jer 7:11) <sup>18</sup>Ra mono kva vahe'mozane, kasegerema ugagota hu'naza vahe'mo'za nentahiza, inankna huta ahegahune hu'za ahesaza kankamunku hakrenaze. Na'ankure zmagra koro Agrikura hu'naze. Hagi maka vahe'mo'za rempima huzamia zankura antri hu'naze. <sup>19</sup>Ana kinaga Jisasi'ene amage'ma nentaza disaipol nagamo'za, rankuma atre'za fegi'a vu'naze.

**Sifnama hente'nea fiki zafamo hagege hu'nea naneke**  
(*Mat 21:20-22*)

<sup>20</sup>Nanter a nevu'za kazana, sifnama Jisasi'ma ahente'nea fiki zafamo'ene arfu'na'amo'a, osapa re'nege'za ke'naze. <sup>21</sup>Pita'a Jisasi'ma

hu'nea kegu age'sa nentahino anage hu'ne, Hurami ne'moka ko! Okima sifna kema hunka raga renontenka osaparo hu'nana Fiki zafamo'a osapa re'ne. <sup>22</sup>Jisasi'a kenona anage huno zamagrira zmasami'ne, Anumzamofonte tamentinti hiho. <sup>23</sup>Tmage hu'na neramasamue, mago vahe'mo'ma ami agonagu'ma huno, otinka hagerimpi takauro huno tare aghesa ontahi amentinti nehuno hanigeno'a, amane ke haniaza huno fore hugahie. <sup>24</sup>E'ina hu'negu anage hu'na neramasamue. Nazankuma nunamu hunka Anumzamofa antahima kesunka, hago eri'noe hunka kamentinti hanunka erigahne. <sup>25</sup>Hagi otinka nunamu hunakuma hanunka, mago'mo haviza hugante'nesnia zana atrento, anama hanunkeno'a, monafi nemanina Nafakamo'a kagri'enena kumika'a atregantegahie. <sup>26</sup>[Hu'neanagi kagra vahe'mofo kefoza atre ozmantesanana, monare mani'nea Nfakamo kagri kefozana anazanke huno atre ogantegahie.]

**Jisasi hanavegu agenoka hu'naza naneke**

*(Mat 21:23-27, Luk 20:1-8)*

<sup>27</sup>Jerusale kumate ete uhnatizageno, Jisasi'a ra mono no kumapi neville'za, ra mono kva vahe'mo'zane, kasegere ugagota hu'naza vahe'mo'zane, mago'a ugagota kva vahe'mo'zane, nege'za Jisasinte e'za, <sup>28</sup>anage hu'za antahige'naze, Kagra ina hihamure hakare zana eri fore nehane? Iza hihamua kamigenka hakare zana nehane? <sup>29</sup>Jisasi'a zamagri kura anage huno hu'ne, Nagra ete tamagrira mago'zanku tmantahigegahue, ana kenona'a hutenkena, aza hihamu namigena erizana e'nerufi tmasmigahue. <sup>30</sup>Nasamiho, Joni mono ti frezmante'nea, zana monafinti e'nefi, vahe'mo erifore hu'ne? <sup>31</sup>Jisasi nehige'za zamagra ohumi ahumi nehu'za anage hu'naze. Tagrama monafintire huta hanunkeno'a, Agra anage hugahie. Hagi nahigetma tamentinti ana zankura nosaze huno hugahie? <sup>32</sup>Hianagi vahe'mo eri fore hu'ne, huta osugosune, nehu'za maka veaku koro hu'za atre'naze. Na'ankure maka veamo'za Joninkura, tamage kasnampa nere hu'za antahinaze. <sup>33</sup>Anage nehu'za Jisasina kenona hunte'ze, ontahinone hazageno Jisasi'a anage huno zmasami'ne, Nagra nena iza hihamufi eri'zana enerue ontasmigahue huno hu'ne.

**Hoza nafa'amofa mofavrene eri'za vahe'a zmazeri haviza hu'nea fronka naneke**

*(Mat 21:33-46, Luk 20:9-19)*

**12** <sup>1</sup>Jisasi'a erigafa huno fronka ke zmasami'ne, mago mopa agafa ne'mo'a waini hoza kri'ne. Ana hoza kegina huno, waini'ma tatisia keria asenteteno, mni'nenon kvahu nona kinte'ne. Zoka mni'nenon ikante zgo miza seterehu (rent) vahete, hoza'a netreno afete ka vu'ne. <sup>2</sup>Hozama vasage knama egeno'a, kazokzo eri'za ne'a huntengeno, agri'ma refko hu'za amisnazama'a

erisnigu, kegva hune'za ikantema mizama (rent) nezamiza naga'mokizmire e'ne. <sup>3</sup>Ana hianagi, anama kegva hu'naza nagamo'za, azeri'za knonkeve nemi'za, atrageno mago'zana e'ori amane vu'ne. <sup>4</sup>Ete mago'ane ru kazo kazo eri'za ne'a huntegeno vige'za, anu rutane'za ahete'za, ke huhaviza hazageno atreno e'ne. <sup>5</sup>Ana hazageno ete mago'ene ru huntegeno vimofona, ahe frigeno hakare huzmantege'za nevzageno, mago'a knonkeve nezami'za, mago'a zmahe fri'naze. <sup>6</sup>Ana hazageno, magoke avesi avesi hunentea mofavrege mani'ne. Ana huzmante vgareteno, henkarfana magoke mani'nea mofavre'a hunenteno, zamagra magoke mofavre ni'agi'za antahimigahaze hu'ne. <sup>7</sup>Hianagi ana hoza kva hu'naza vahe'mo'za, zamagra zmagra anage hu'naze, nafa'amofa zama erisanti haresia nera ama eanki, enketa ahe frisunkeno nefa feno zamo'a, tagriza se'nie! Hu'za hu'naze. <sup>8</sup>Ana nehu'za azeri'za ana mofavrea ahe frite'za, avufa'a waini hozafinti megi'a mate vu'naze.

<sup>9</sup>Waini hozamofo nefa'a nankna eme hugahie? Agra eno waini hoza kegva krinaza vahera eme zmaheno, waini hoza ru vahe'mokizmi eri zaminke'za, kegva hugahaze. <sup>10</sup>Hanki ama naneke Anumzamofa avontafepi krente'nazana hampritma ontahinazo? *Nogi vahe'mo'za haviza hie huza atre'naza havemo'a, no renage antepinka no azeri hanaveti have fore hu'ne.* <sup>11</sup>Anumzamo ama anazana hu'neanki, tavuma konana knare zantfa hu'ne. (Sam-Zga 118:22-23)

<sup>12</sup>Hagi ana vahe'mo'za azeri'saza kanku hakre'naze. Na'ankure fronka kema hu'neana zamagriku hu'ne. Hianagi zmagra tusi'a vahe kevugu koro nehu'za atre'za vu'naze.

**Takisi zgo Sisama amizanku Jisasina antahige'naza naneke**  
(Mat 22:15-22, Luk 20:20-26)

<sup>13</sup>Hagi Juda kva vahe'mo'za Jisasina rehe'za kema huhaviza hanige'za, ana ke eri'za keaga hunte'naku, mago'a farisi vahe'ene, Heroti naga'ane huzmantege'za vu'naze. <sup>14</sup>Zamagrama Jisasinte'ma ne-eza anage hu'naze, Hurami ne'moka, tagra antahi'none, kagra tamagege nehunka, mago vahekura koro nosunka, havi vahe'ene fatgo vahe'ene mago'zanke hunka Anumzamofa fatgo kankura rempi huneraminketa nentahune. Hagi knare Sisana takesia amigahumpi omigahune? <sup>15</sup>Hianagi krunage haza nezamageno, anage huno zmasami'ne, na'a higetma Nagrira renahetma negaze? mago zagoa eritma enkena kaneno, <sup>16</sup>hige'za mago zago eri'za eme amizageno, iza amema'ane avone me'ne? Hige'za zmagra hu'za, Sisane hu'za hu'naze. <sup>17</sup>Anante Jisasi'a amanage huno hu'ne, knareki Sisa zana Sisa amigahaze. Hagi Anumzamofa zana, Anumzamofa amigahaze huno hige'za tusiza hu'za antri hu'naze.

**Fripinti otino arave hanaza zanku antahige'naza naneke?**  
(Mat 22:23-33, Luk 20:27-40)

<sup>18</sup>Mago'a Satusi mono vahe'mo'za (fripinti o'totigahaze nehaza vahe'mo'za) Jisasinte e'za anage hu'za antahige'naze. <sup>19</sup>Hurami ne'moke,

anage huno korapa Mosesi'a avona krerami'ne, mago ne'mo'ma **ara eriteno mofavre ontenu frinkeno'a, nefu ana ara erinuno, mofavre ksentesisigeno, nefu agimo'a fanane osugahie huno avona krente'ne.** (Diu-Kas 25:5-6) <sup>20</sup>Hagi 7ni'a kogna mani'nazafinti, agonesa zimimo ara eriteno mofavre ontenu frine. <sup>21</sup>Nagna'amo ana ara eri'ne. Eriteno mofavre onte frigeno, anante'mo'a anazanke huno ana ara eriteno, mofavre ontenu fri'ne. <sup>22</sup>Ana 7ni'a kogna naga'mo'za, magore hu'za mofavre kse onte fri vgaretageno, ana ara henka'a fri'ne. <sup>23</sup>Fri'pintima oti knazupa, ana maka kognamo'za fri'pintima oti'nageno'a, iza a' manigahie? Na'ankure maka ana 7ni'a kognamo'za ana ara kazo eritere hute'za fri'naze. <sup>24</sup>Jisasi'a anage huno zmasami'ne, hantagama hazana, tamagra Anumzamofu avontafepi kre'nea kea antahitma ketma osuta, Anumzamofu hihamu'a onkenetma nehazafigure. <sup>25</sup>Na'ankure fri'nehnafinti'ma oti snazana, arave hu'zana omnesigeno, ara vasi omi ami hu'zana omnesigeno, monafinka ankeru vahe'kna hu'za manigahaze. <sup>26</sup>Hianagi tamage nanekema me'neana frite'za otigahaze. Anumzamofu onensa zafa tevenerefinti Mosesenku ke higeno antahiteno, avontafepi krente'neana omne'negeta hamprita onkenetma nehazo? Anumzamofu amanage huno asami'ne, *nagra Abrahamu Anumza mani'na, Aisaki Anumza mani'na Jekopu Anumza mani'noe.* (Eks-Uti 3:2, 6) <sup>27</sup>Huno hu'negu, Agra fri vahe'mokizmi Anumzana omani'neanki, ksefa hu'za mani'naza vahe'mokizmi Anumza manine, tamagra tusi'a hantaga nehaze.

**Ugota hu'nea kasegemofu naneke**  
(*Mat 22:34-40, Luk 10:25-28*)

<sup>28</sup>Hagi mago kasegere ugagota hu'nea ne'mo eme antahiana ke hakare nehazageno, Jisasi'a so'eza huno kenona zamirera nezmasamigeno, ananke eme nentahino, Jisasi'na antahigeno, maka kasegefina ina kasegemofu vugota hu'ne? <sup>29</sup>Higeno Jisasi'a amanage huno hu'ne, kagota kasegea amanahu me'ne, *Israeli vahe'mota antahiho, Ramo'a tagri Anumzane. Rana agrake mani'ne.* <sup>30</sup>Kagra kagu'areti Anumza ka'amofona avesinto, maka kamema'areti hunka avesinto, maka antahintahi ka'areti hunka avesinto, maka hanave ka'areti hunka avesinto hu'ne. (Diu-Uti 6:4-5) <sup>31</sup>Anantera amanahu kasege me'ne, *kragagu kavesi nentanaza hunka tva'onkare'ma mani'nenimofona avesinto.* (Lev-Pris 19:18) Ama tare kasegemofona mago kasegemofu'e huno znagateore'ne <sup>32</sup>Kasegere ugota hu'nea ne'mo'a anage hu'ne, Hurami ne'moka, tamage hunka hane, Agra magoke mani'neankino magore huno amefiga'a vahera omani'ne. <sup>33</sup>Ana hanigeta Anumzamofona tagu'areti avesinteta, maka antahintahireti avesinteta, maka hanavereti avesinteta, tagragu tavesi nentonaza huta tva'onte maninesaza nagara zmavesinte sunazamo'a, kre sramna vuzane,

Anumzamofu hakare zanka'a ami'zana agatereno ugagotaza me'ne.  
<sup>34</sup>Jisasima antahiana ana ne'moma kenona'a hu so'e higeno, anage huno asami'ne, kagra Anumzamofu kuma tava'onte mani'nane. Higeno mago'a vahe'mo'za antahige zankura koro hu'za antahi onke'naze.

**Kraisi'a aza mofavre hu'za hu'naza naneke**

*(Mat 22:41-46, Luk 20:41-44)*

<sup>35</sup>Jisasi'ma ra mono nompri rempi hunezamino, anage hu'ne, na'ante kasegere ugagota hunaza vahe'mo'za Kraisinkura, Deviti nemofo'e nehaze?

<sup>36</sup>Ruotge Avamumo Daviti azeri otigeno amanage hu'ne, *Ramo'a anage huno Ranimofonkura hu'ne, Nazantmaga kaziga trate manige'na, ha' vaheka'a kagafinka azeri fenkamu atraneno hu'ne.* (Sam-Zga 110:1)

<sup>37</sup>Devitima agra'ama huno Ranimo'e hanigeno'a, nankna huno Deviti mofavre manigahie?

**Kasegere ugagota hu'naza vaheku kva hanaza naneke**

*(Mat 23:1-36, Luk 20:45-47)*

<sup>38</sup>Rempima huzamifina Jisasi'a anage huno mago'ene zmasami'ne, kasegere ugagota hu'naza vahekura kva hiho. Zamagra za'za kukena hu'za maketi kumapi hakare vahe'mo'za nezmage'za muse huzmante zanku zmavesi vahere. <sup>39</sup>Hanki osi mono nompri vugota hu'nea trate unemaniza, nezama nepina zmagi eri trate nemanize. <sup>40</sup>Kento a'nemokizmi krunage hu'za feno zimi eneri'za zamo, eama hu'zanku zaza nunamu nehaze. Ana hu'negu ama anazamofu mizama'a, agatere'za ranknaza erigahaze.

**Kento a'mo ofa zago ante'nea naneke**

*(Luk 21:1-4)*

<sup>41</sup>Jisasi'a ra mono nompri, zagoma nentaza taferomofu tva'onte mani'neni zagoma eme antazana zmage'ne. Feno zimi me'nea vahe'mo'za rama'a zago eme ante'naze. <sup>42</sup>Ana nehageno amunte omane kento a'mo eno, tare osi koranke zago mago toza avamente me'nea erino ana taferopi eme netregeno, <sup>43</sup>Jisasi'a amage'ma nentaza disaipol nagara ke hige'za ageno anage huno zmasami'ne, tamage hu'na neramasmue, ama amunte omane kento a'mo rama'a zagoa ruga'a vahera zmagetereno taferopina eme ante'ne. <sup>44</sup>Na'ankure maka vahe'mo'za rama'a ante'nafinti, osi' ofa zago'a eme ante'naze. Hianagi ama kento a'mo'a amunte omnefta hunefinti eri'neama'a ante vga reneankino, miza seno neneno manisiazana omane'ne.

**Ra mono no tapage hugahie hu'nea naneke**

*(Mat 24:1-2, Luk 21:5-6)*

**13** <sup>1</sup>Ra mono nompinti atiramigeno, amage'ma nentaza disaipol nagapinti mago'mo anage hu'ne, Hurami ne'moke, asinentike

havereti hiro naro nontamina ki'nazanki ko! <sup>2</sup>Higeno Jisasi'a anage huno zmasami'ne, tamagra ama hironaro nontami negazo? Mago havemo'a, mago havemofo agofetura omane'tfa hugahie. Mika havemo fragu vazi ramigahie.

**Maka'zama vgarenaku hania knafi fore hanizamofu naneke**  
(*Mat 24:3-14, Luk 21:7-19*)

<sup>3</sup>Anante ra mono nomofu kantu kaziga, Olive agonare Jisasi'a marerino umaninege'za, Pita'ma, Jemisi'ma, Joni'ma, Endru'ma hu'za zamagrake emanine'za Jisasi'na antahige'naze. <sup>4</sup>Tagrira tasamio, nankna zupa anazana fore hugahie? Anazama fore hunaku'ma hanigeno'a, nankna avame'za fore hinketa ketenunkeno ana knazana fore hugahie? hu'za hu'naze. <sup>5</sup>Jisasi'a agafa huno zmasami'ne, mago'mo havige huno tmavareno havi kante vu'zankura, kva hiho. <sup>6</sup>Rama'a vahe'mo'za Nagri nagifi ne-eza anage hugahaze, Nagra ana ne' ama'i neoe nehu'za, rama'a vahe havi kante zmvarentegahaze. <sup>7</sup>Hanki ha'ma hania kema nentahita, ha'mofu zaho nanekema antahi sanuta korora osiho. E'ina hu'zana fore hugahie. Hianagi vgare kna ome'ne. <sup>8</sup>Hanki anantera mago kumate naga'mo'za, oti'za mago kumate nagara zmahegahaze. Mago kaziga vahe'mo'za oti'za, mago kaziga vahera ha' rezmantegahaze. Ana nehnageno mago'a kumapina imi e'nerisigeno, mago'a kumapina agate'za fore hugahie. Ama anazamo'a, a'moma mofavre kasentenaku higeno, agafa huno ata negriankna ataza fore hugahie.

<sup>9</sup>Hanki tamagra tamia kva hutma maniho. Kanisol vahete tmavare'za nevu'za, osi mono nOMPI tamavre'za knonkeve ome nerami'za, rankuma kva vahete'ene kini vahe zamavure tmavrentesageta otigahaze. Na'ankure nagriteku ana hanageno, e'i anazama fore'ma haniana nagri nagenkema eri'ama hutma nezmasami'za zanteku fore hugahie. <sup>10</sup>Hanki esera maka mopane mopanena vahe'mo'za knare musenkea huama hanageno antahi vgaretesageno'e. <sup>11</sup>Keaga hurmanteku tmazeri'za vnagetma, na'ane huta hugahune hutma antahintahi hakare osiho. Ana knafima hiho hunoma hania nanekea amane hiho. Na'ankure ana nanekea tamagra'a osugahazanki, Ruotage Avamumo hugahie. <sup>12</sup>Ana knafi nefuna ahe frinogu avare nezaminkeno, nefa'a nemofona avreno ahe frinogu anazanke nehinkeno, mofavremo'za anazanke huza nerera nefana zmahe frinogu avare zamigahaze. <sup>13</sup>Maka vahe'mo'za tmagrira zmarimpa kna hunermante'za ha' reramantegahaze. Na'ankure Nagri nagimo'a tmagripi me'negu hu'za anara hurmante'gahaze. Hianagi iza'o oti hanavetino manino vu refarega vanimofona agu vazigahie.

**Maka'za agtereno haviza hania zamofu naneke**  
(*Mat 24:15-28, Luk 21:20-24*)

<sup>14</sup>Jisasi'a anage huno zmasamine, nanekema hampri snamota, nehamprita ama hiho. Tusi'a havizantfa huno agotenesizamo, agra



otiga osu'nenia trate otina, ana knazupa Judiana mani'nesaza veamo'za freza agonare viho. (Dan 9:27, 11:31, 12:11) <sup>15</sup>Nomofa agofetuma mani'nesamo'za, uramiza nompintira mago'a zana eriza atioramigahaze. <sup>16</sup>Hozafima mani'ne snimo'a, kuma'aregati kukena'a eme e'orino, koro fregahie. <sup>17</sup>Ananknafima amu'ene hu'nesnia a'negu'ene, mofavre aminte mani'nesnia a'negura, nasunku huzmantoe. <sup>18</sup>Hianagi nunamuna nehinkeno, tusi'a zasi knafina anazana forera osino. <sup>19</sup>Na'ankure ananknafina tusi'a knaza fore hugahie. Anumzamo mopa tro hu'nereti eno menima ehanatinerera, fore osu'neankna knaza fore hugahie. Hagi henka'a ana hukna knaza fore osutfa hugahie. <sup>20</sup>Ramo'a ana knama eri atupa osanigeno'a, mago'a vahera omanigahie. Hianagi Nagri vahere hunefinti huhampri'nea vahekuma agesama antahiteno, ana kna eri atupa hugahie. <sup>21</sup>Ana knafi mago'a vahe'mo'za hu'za, keho ama'i kraisi'e huge, agra antu mani'ne hanigetma tamentintia osutfa hiho! <sup>22</sup>Na'ankure ana knafina mago'a havige kraisi'e huza efore nehu'za, kasnampa vahe efore hu'za, haviza hu'za kagu'vazane avame'za hugahaze. Anama hanazana Anumzamo'ma huhampri zmante'nea vahe'mokizmi, rezmataga hu'naku hugahaze. Hianagi zmagra Anumzamo'ma huhampri zmantenea vahe zmazeri savari hu'naku anara hugahaze. <sup>23</sup>Hagi tamagra kva hutma maniho! Ana maka'zana fore osunege'na, tamagrira neramasamue.

**Vahe'mofa Mofavremo ete esianknamofa naneke**

*(Mat 24:29-31, Luk 21:25-28)*

<sup>24</sup>Hianagi ana knafina tusi'a knazamo vgama resigeno'a, zagemo hani hanigeno, ikamo'a remsa osanigeno, <sup>25</sup>monafinti hanafi tamimo'za atafri neraminke'za, monafi me'nea hanave zantamimo'za tore hugahaze. (Aisa 13:10, 34:4, Joel 2:31-32) <sup>26</sup>Anante Vahe'mofa Mofavremo'a hampompi, tusi'a hihamu'ane msa'afi ne-esigeta kegahaze. (Dan 7:13) <sup>27</sup>Anante ankeri vahe'a huzmantena, Anumzamo huhampri zamante'nea vahera mona mopa ome tre emetre kazizatira ome zmavare eme zmavare hu'za zmazeri atru hugahaze.

**Fiki zafamofa fronka naneke**

*(Mat 24:32-35, Luk 21:29-33)*

<sup>28</sup>Ama fronka kema fiki zafare'ma hanua fronka kereti antahizana eriho. Azanku'namo asinareno amosrema nehegetma, hago zgegna tava'o nehie hutma nentahize. <sup>29</sup>Tamagra anahu zama fore'ma hanigetma negesnutma, hago Vahemofa Mofavre esia kna'a tava'o huno kafante me'ne hutma tamagesa antahiho. <sup>30</sup>Tamage hu'na tamagrira neramasamue. Ama knafi veamota ofri mani'nesnageno, ana zana fore hugahie. <sup>31</sup>Monane mopane fanane hugahianagi, Nagri nanekemo'a fanane osu mevava hugahie.

**Jisasi'ma esia kna mago vahe'mo'e huno ontahine hu'nea naneke**  
(*Mat 24:36-44*)

<sup>32</sup>Hianagi mago vahe'mo'e huno anazama fore'ma hania knane zgenena ontahi'ne. Monare nemaniza ankeri vahe'mo'za ontahi'zageno, Mofavre'amo'a ontahi'ne. Nenfa Agrake ana kna antahi'ne. <sup>33</sup>Kva hunetma retro hutma maniho. Na'anakure tamagra anazama efore'ma hania kna ontahi'naze. <sup>34</sup>Amanahu hugahie, mago ne'mo afete vunaku, kazokzo eriza vahe'a noma'a kegva hiho hunezmanteno, magoke magoke eri'za vahe'a eri'za refko hunezamino, kafante kva nekura kavu antenka maninenka kva hu so'e huo huno hunte'ne. <sup>35</sup>E'ina hu'negu tamagra anahu kna huta, kva hu so'e huta maniho. Nomofu nfa'amo esnia kna ontahi'naze. Kinaga esifi, kenage amu'no esifi, kokore ke nehinkeno esifi, nantera esifi ontahi'naze. <sup>36</sup>Aru mase nenageno, ame huno eno eme tamageno eri fore hanigi, kva hutma maniho. <sup>37</sup>Hanki tmagri'ma neramasmuana mifka veaku nehue. Kva huso'e hiho.

**Kva vahe'mo'za Jisasi ahesnageno frisia ke hu'naza naneke**  
(*Mat 26:1-5, Luk 22:1-2, Jon 11:45-53*)

**14** <sup>1</sup>Anumzamo Israeli vea kinafinti zmare'nea knagu antahimi'za zo'ore breti nenaza kna zahufa tare zgegna me'nege'za, ra mono kva vahe'mo'zane, kasegere ugagota hu'naza vahe'mo'za, Jisasi havige hunte'za oku azerizama ahesaza kanku hake'za ahe fri'naku huge antahige hu'naze. <sup>2</sup>Na'ankure mafka vahe'mo'za ana ne'zama (pasova) nenaza knare'ma ana'ma hanunke'za, ke hakare nehu'za ha' azeri oti'za huhaze.

**Mago a'mo Jisasina mna nentake masave tagino frente'nea naneke**  
(*Mat 26:6-13, Jon 12:1-8*)

<sup>3</sup>Jisasi'a Betani kumate ko fugo namure'nea ne'mofo Saimoni nomp, zmaza tununte manine'za trateti ne'za nenageno, mago a'mo zago'amo'a mareri'nea, mananentake masave zafa rafunareti tro hu'naza, alabasta tafempi erino e'ne. Ana tafe avaza'a runagino Jisasina anumpi taginte'ne. <sup>4</sup>Hianagi mago'amo'za anampi mani'namo'za zmasigu nehu'za, zamagra zmagra anage hu'naze, na'a higeno ana masavena amne tagi netre? <sup>5</sup>Mizante atreta 300ti'a zago nazana erita zamunte omene vahe zmuntetine. Hianagi nahigenka amnefina tagi netrane? Ana nehu'za ana ara kesu'naze. <sup>6</sup>Hianagi Jisasi'a amanage huno zamasmine, atrenkeno manino, nahigeta ama ara kna nemize? agra knare so'eza hunenante. <sup>7</sup>Hianagi zamunte omene veara, hakare kna tamagra ne maninenageta, ina knare'ma, knare tmavu tmavama huzmante'nakuma hanutma, amne huzamantegahaze. Hianagi Nagra hakare kna tamagra nena omanigahue.

<sup>8</sup>Agra nazano hunantenaku hiazana hago hunante. Kerifima ufresugu masave frenanteno retro hunante. <sup>9</sup>Nagra tamage hu'na neramasamue, inantego knare musenkeni'a, eri'za kokankoka ome huama hanarega, ama a'mo hu'nea avu'avamofa agenkea, nehnage'za antahigahaze.

**Judasi komoru huno Jisasina ha' vahe avrezmisia naneke**  
(*Mat 26:14-16, Luk 22:3-6*)

<sup>10</sup>Tuelufu'a amage'ma nentaza disaipol nagapinti, Judas Iskarioti'a Jisasina komoru huno avrezamisia naneke vugota mono kva vahera ome zmasami'ne. <sup>11</sup>Ana nanekema nentahiza muse hunte'naze. Judasina zago kamigahune hu'za huvempa kea asamizageno, Jisasima komoru huno ha' vahe zmazampi avare'zamisia, kanku agafa huno hakre'ne.

**Vgare ne'za Jisasi'a disaipol naga'ane ne'nea naneke**  
(*Mat 26:17-25, Luk 22:7-14, Jon 13:21-30*)

<sup>12</sup>(Zo'ore breti nenaza kna efore higeno) e'se knazupa kinafinti Anumzamo'ma ozmahe zmagatere'nea kna antahimiza sipisipi afu anenta aheza kre sramna nevaza knazupa, Jisasima amage nentaza disaipol nagamo'za anage hu'za antahige'naze, inantega Kagrira kinafinti zmare'nea knagu antahimi'za nenaza (Pasova) ne'zana retro hugantesunegu kvenesi'e? <sup>13</sup>Jisasi'a tare disaipol ne'tre amage'ma nentaza nagapinti znasmi'no, Jerusale kumapi ufresakeno'a, mago ne'mo ti fi kavofi tifino ne-enketa ome tutagiha hunesuta, ana ne' avaririta vugaha'e.

<sup>14</sup>Ana ne'mo ina nompino umrerisiana, ana nomofo nefana amanage huta antahige'o, Rempi hurami ne'mo'a kagriku huno, inantega disaipol naganiane Anumzamo ozmaheno zamagtere'nea zanku antahimiza nenaza nezana, kankmuna me'nea negahuno hu'ne? <sup>15</sup>Hanunkeno'a mago hunaraginte nomofo anaga kaziga, ra kakamu me'nesifi agra tanaveri hugahie. Anampina ne'zane sipa ko retro hunte'naze. Ana nomp mareritna nezana ome retro huranteho. <sup>16</sup>Anage hige'ne ana netre moke vu'ne, rankumate vu'na'e. Anante Jisasi'ma zmasami'nea kante fore higene ke'na'e. Anumzamo ozmahe zmagatere'nea knagu antahimiza nenaza ne'zana ome retro hu'na'e. <sup>17</sup>Kinaga sege'za, Jisasi ene amagama nentaza 12fu'a disaipol naga'ane e'naze. <sup>18</sup>Ne'zane sipare mani'neza ne'za nenageno, Jisasi'a amanage huno zamasmi'ne, tamage hu'na neramasamue, amafima magoka nezama nenompinti, mago'moka komoru hunka ha' vahe zmazampi navrentegahane. <sup>19</sup>Zmarimpamo'a ana kegu kna nehige'za, mago mago'mo'za nagra anara osugahue hu'za hutere hu'naze! <sup>20</sup>Jisasi'a kenona z mire amanage huno zmasami'ne, 12fu'a nagamotafinti, Nagrane magoka zompafinti breti areno nenesnimo'e. <sup>21</sup>Na'ankure Anumzamofa avontafepi krente'nea kante, Vahe'mofo

Mofavremo'a vugahie. Hianagi Vahe'mofo mofavrema komoru huno ha' vahe zmazampima avrente'simo'a, knaza erigahiankina nasunku huntoe. Nererama kase onteasina knare'zantfa hisine!

**Jisasi'a Bretine wainine zamige'za ne'naza naneke**  
(*Mat 26:26-30, Luk 22:15-20, 1 Kor 11:23-25*)

<sup>22</sup>Ne'zama nenageno, Jisasi'a mago'a breti erino Anumzamofu antahigegenom asomu huntegenom, tamanasino nezmino amanage huno zamasmine, Ama'i Nagri navufe, erita neho. <sup>23</sup>Hagi waini tintafe erino Anumzamofu nunamu huno antahigegenom asomu huntegenom, zamige'za maka'mo'za anampinti ne'naze. <sup>24</sup>Nenageno amanage huno zamasmine, ama'i Nagri korane, ama ana koramo Anumzane huhagerafita manisaza manizana eri kasefa hugahie. Maka'mofonku huno tagine. <sup>25</sup>Tamage hu'na nerasmue, Ama waini ragamofu tima'a mago'ene one'na henka'a Anumzamofu kumapi kasefa waini negahue.

<sup>26</sup>Mono zgame hute'za, atirami'za Olive Agonarega vu'naze.

**Pita'a amagena Jisasi humisnia naneke**  
(*Mat 26:31-35, Luk 22:31-34, Jon 13:36-38*)

<sup>27</sup>Jisasi'a amanage huno zamasmine, tamagra makamota natreta fregahaze. Na'ankure Anumzamofu avontafepina amanage huno krentegenom me'ne, *Anumzamo'na sipsipi afu kva vahe'mofona, ahanena sipsipi'mo'za panani hu'za ufre efre hugahaze* hu'ne. (Sek 13:7)

<sup>28</sup>Hianagi fritena otisuna, tamagrira vugota hurmante'na Galili vugahue. <sup>29</sup>Pita'a anage huno Jisasina asamine, mika'mo'za katre'za vnazanagi, nagra katrena ovutfu hugahue. <sup>30</sup>Pitana kenona Jisasi'a amanage huno asmine, Tamage hu'na negasmue, meni kenagera tare zupa kokoremo'a krafa osu'nesigenka, tagufa zupa Jisasina onke'noa nere hunka vahane hugahane. <sup>31</sup>Hianagi Pita'a agra'a kere hu hankavetino, vahane huogantegosue nehuno, amne kagranena frigahue huno hu'ne. Hige'za mika'mo'za ana kege'za hu'naze.

**Jisasi'a Getsameni hozafi nunamu hu'nea naneke**  
(*Mat 26:36-46, Luk 22:39-46*)

<sup>32</sup>Jisasi'ene amage nentaza disaipol naga'mo'za Getsamenie nehazare ehnti'naze. Anante Jisasi'a zmasamino, amare mani'nenkena nunamuna haneno.

<sup>33</sup>Anante Pitanki, Jemisinki, Joninki huno zmareno nevigeno, agu'amo'a tusi'gna nehigeno, asunku hu'ne. <sup>34</sup>Jisasi'a amanage huno zamasmine, nagu' namemo'a tusi kna navenesino nahe friza nehianki, amare mani'neta kva hiho. <sup>35</sup>Nehuno osi'a vugamuteno mopafi vuttrakahu maseno, Anumzamofonte nunamu ome nehuno, knare'ma hanigeno'a, ana

knamo'a evu nagateresie hu'ne. <sup>36</sup>Agra huno, Aba, Nfanimoke! Maka'zana amane hugahane, ama kapua eri atro, Nagri navesira ovarario, Kagra kavesi avaririo. <sup>37</sup>Ana huteno eno eme amagama nentea disaipol nagama zmageana masenageno, Pitanku amanage huno antahige'ne, Saimoniga kavu mase'nano? Knare osi'agnafina kva krigahampi? <sup>38</sup>Kvahunka maninenka, nunamu nehunka revatgazama esifina evuoramio. Avamumo'a avenesianagi, avufamofona hanave'a nomane. <sup>39</sup>Ete mago'ane vuno, anahu kna nunamu ome hu'ne. <sup>40</sup>Agrama mago'ene ete eno eme zmageana, mase'nagenokino zamuma hari huzamo'a kna huzmante'ne. Na'ane huta ke'arera hugahune hu'za kegura hake'naze. <sup>41</sup>Jisasi'a mago'ene tagufa zupa zmagrite eno, amanage hu'ne, tamavu nemseta manigasa nehazo? Ha vgare! Nagrira knani'a ama eanki keho. Vahe'mofo Mofavrea kumi vahe'mokizmi zmazampi komoru hu'za avrente'gahaze. <sup>42</sup>Otinketa tagra vamenno! Keho Nagri'ma komoru huno ha' vahe zmazampima navrentesia nera, ama erava'o nehie.

**Komoru hige'za Jisasi azeri'naza naneke**  
(*Mat 26:47-56, Luk 22:47-53, Jon 18:3-12*)

<sup>43</sup>Anankea huvga ore'negenno, amage'ma nentaza 12fu'a disaipol nagapinti mago'zmimo, Judas Iskarioti anante ehnatine. Agri'enenana sondia vahe'mo'za kaziknone, kumpa kno zmine eri'neza, prisi kva vahe'mo'zane, kasegere ugagota hu'naza vahe'mo'zane, ugota kva vahe'mo'za huzmantege'za e'naze. <sup>44</sup>Judasi'a ha' vahe zmazampi komoru huno avrezmi ne'mo anage hu'ne, amanahu avame'za hugahuanki keho, ome agi'ma antakoma hanuana, e'i ana neki ome azerita kegva huta avreta viho. <sup>45</sup>Judasi'ma anantema ne-eno'a, Jisasinte hantka huno vuno, Hurami Nemoke, nehuno agira antako hu'ne. <sup>46</sup>Anante mafka vahe'mo'za zmaza ante'za, azeri'naze. <sup>47</sup>Anante otinazafinti mago'mo kazinknoma'a erisaga huno, ugagota prisi ne'mofo kazokzo eriza ne'mofo agesa rukfri atre'ne. <sup>48</sup>Jisasi'a amanage huno zmasami'ne, Nahigeta Nagri nazeriku kazintamine kumpa knontaminena enerita kumzafa vahe zmazeriku nehzankna hutma neaze? <sup>49</sup>Maka knane knane, ra mono nOMPI rempi huneramugeta, naze'ori'naze. Hianagi amama fore'ma nehizana, korapa avontafepi kre'nea kemofo avufga'a fore nehie. <sup>50</sup>Anage nehige'za amage'ma nentaza nagamo'za, atre'za koro fre'naze. <sup>51</sup>Mago nehaza nera amage anteno vu'nea ne'mo, mago'a kukena osu'neanki zaza kukenage'za hu'nea ne' azeri'naze. <sup>52</sup>Hianagi ana zaza kukena'a ruzafi atreno, avufa avapa koro fre'ne.

**Jisasina avre'za mono kanisol vahete vu'naza naneke**  
(*Mat 26:57-68, Luk 22:54-55,63-71, Jon 18:13-14,19-24*)

<sup>53</sup>Jisasina avare'za ugagota prisi kva nete vzageno, ranra prisi kva vahe'mo'zane ranra kva vahe'mo'zane, kasegere ugota hu'naza vahe'mo'za

atru hu'naze. <sup>54</sup>Pita'a, Jisasina amefi afete avaririno, ugagota prisi ne'mofo kumapi ufre'ne. Teve hegare'nare avufa ome tonehino ha' kva vahe'ene umani'ne. <sup>55</sup>Ugagota prisi vahe'mo'zane, maka kanisol vahe'mo'za Jisasina havige hunte'za ahesnaza ke agafa'agu hakre'naze. Hianagi magore hu'za ke'za eri fore'osu'naze. <sup>56</sup>Rama'a vahe'mo'za havige hunte'nazankino, ana ke zmimo'a magoke kantera ovu'ne.

<sup>57</sup>Mago'a mo'za oti'za amanage hu'za havige hunte'za, <sup>58</sup>tagra nentahunkeno ama ne'mo anage hu'ne, ra mono nona vahe'mo zmazanuti ki'naza no tapage hunetrena, tagufa knamoyo agu'afi vahe'mo azanuti onki'nea mono no ru kigahue hu'ne. <sup>59</sup>Hianagi kezamimo'a fatgo osu'ne.

<sup>60</sup>Anante ugagota prisi kva ne'mo zamuga otino, anage huno Jisasina antahige'ne, na'ane hunka kezimirera huzmante'gahane? Na'anku Kagrira keaga hunegantaze? <sup>61</sup>Hianagi ke nona'a osu akoheno mani'negeno, mago'ene ugota prisi ne'mo'a antahigeno, Kagra Kraisigo, Mrerisa Anumzamoyo mofavremokafi? <sup>62</sup>Jisasi'a huno, *E'i Nagre* kagra negesankeno, Vahe'moyo Mofavremo Anumzamoyona *azantmaga kaziga manino* hampompi tusi'a hanave'ane egahie. (Eks-Utr 3:14, Sam-Zga 110:1) <sup>63</sup>Anankema nentahino, ugota prisi ne'mo agra'a kukena eri tagato nehuno anage hu'ne. Na'anku mago'enena keagama hufore hunte vahekura hakegahune. <sup>64</sup>Hagi tamagra nentahizageno Ramoyona huhaviza hunte'ne! Tamagra na'ane hutma hugahaze? Makamo'za huza Anumzamoyo huhaviza hunteankino frisie hu'za hunte'naze. <sup>65</sup>Anante mago'amo'za zmavetu ahente'za avu kisu hune'za, zmaza knonu nehe'za, Kagra kasnampa ke hunka, iza negahefi hufore huo. Mago'a ha' kva vahe'mo'zanena avregantu atre'za avugosafi ahe'naze.

**Pita'a Jisasinku, onke'noe hu'nea naneke**  
(*Mat 26:69-75, Luk 22:56-62, Jon 18:15-18,25-27*)

<sup>66</sup>Pita'a ufenkamuteno kva nemofo kumapi mani'negeno, anante ugagota prisi nemofo eri'za mofane zgafinti mago'mo e'no, <sup>67</sup>Pita'ma teve tonehino mani'negeno eme negeno'a, kagranena Nazareti kumateti Jisasi'ene vanoma nehana ne' mani'nane hu'ne. <sup>68</sup>Hianagi Pita'a vahane huno, nagra antahina kena osu'nogenka nehane! Anante kama emrerite nevigeno mago kokorege hu'ne. <sup>69</sup>Ete ana mofa'mo mago'ene Pita negeno anante oti'naza vahe zmasmino, e'i nera Jisasi amage anteno vano nehia nere huno hu'ne! <sup>70</sup>Hianagi ete Pita'a, mago'ene vahane hu'ne. Anante oti'naza vahe'mo'za, osiagna manige'za Pitanku anage hu'za, tamage kagra mago zmimoke. Na'ankure Galili ne' tfa mani'nane. <sup>71</sup>Anante Pita'a ontahinoa neku nehaze nehuno, nagra tamage ana nekuma havigema hanenkeno'a, huvempa huankino Anumzamoyo nazeri haviza hanie huno, <sup>72</sup>nehigeno, ame huno mago'ane anante kokorege nehigeno, Pita'a, Jisasi'ma asmi'nea kegu agha antahi'ne. Tare zupa

kokorege osunenigenka, tagufa zupa Nagrikura onkenoe hunka vahane hugahanema huno asami'nea kegu agesa nentahino zavite'ne.

**Jisasina Paerotinte avare'za vu'naza naneke**  
(*Mat 27:1-2,11-14, Luk 23:1-5, Jon 18:28-38*)

**15** <sup>1</sup>Nanterame ranra prisi mono kva vahe'mo'zane, ranra kva vahe'mo'zane, kasegere ugagota hu'naza vahe'mo'zane, maka kanisol vahe'mo'za, ame hu'za ome atru hute'za, Jisasina nofi kinte'za avre'za Paeroti ome ami'naze. <sup>2</sup>Paeroti'a agenoka huno, Kagra Jiu vahe'mokizmi kini mani'nano? huno Jisasina antahige'ne. E'ima kagra nehanane huno Jisasi'a hu'ne. <sup>3</sup>Anante ranra prisi kva vahe'mo'za, Jisasinku rama'a haviza hu'ne hu'za hunte'naze. <sup>4</sup>Paeroti'a mago'ane agenoka huno ko, Kagrira rama'a ke hunegantazanki, Kagra ke zmirera kenona hugahampi? <sup>5</sup>Hianagi Jisasi'a ana kemofono nona' osu mani'negono, Paeroti'a tusiza huno antri nehuno agogogu hu'ne.

**Jisasi ahe nefrinka Barabas tamio hu'naza naneke**  
(*Mat 27:15-26, Luk 23:13-25, Jon 18:39-19:16*)

<sup>6</sup>Kafune kafune Anumzamo kinafinti z mavre'nea knama egeno'a, Paeroti'a kina vahepintima z mavesimofonku hazageno kazufe netrea kna e'ne. <sup>7</sup>Hagi ana knafi mago nera Barabasi'e nehia ne'ene, mago'a kamani vahe'mozane ha' hu'naza knafi, vahe zmahe frinaza zanku kina huzmante'naza vahe'ene anampina mani'naze. <sup>8</sup>Hagi maka vea'mo'za Paerotinte e'za, ana kna'ma egeno nehiaza huno kina vahe katufe atresnigu antahige'naze. <sup>9</sup>Anante Paeroti'a kenona huno anage hu'ne, Jiu vahe kini ne' katufe tamisuegu tmave'nesio? <sup>10</sup>Na'ankure agra, ranra prisi kva vahe'mo'za kanive renente'za, avare'za eme ami'zama'a ko antahi'ne. <sup>11</sup>Hianagi ranra prisi kva vahe'mo'za maka vahe zmarimpa rekeh'uza, Barabasi kazufe tamiho hutma hiho hu'za zmasami'naze. <sup>12</sup>Anante Paeroti'a mago'ene kenona huno, Jiu vahe kinie hutma nehaza nera, na'a hunesuegu tmave'nesie? <sup>13</sup>Hige'za ete mago'ane kezati'za, aheta kekazafare hantiho hu'naze. <sup>14</sup>Hianagi Paeroti'a anage huno zmasami'ne, na'a kefoza hune, inankna kefoza hu'negeta aheta hantiho nehaze? Hianagi zmagra mago'ene ranke hu'za, ahe friho hu'naze. <sup>15</sup>Na'ankure Paeroti'a ana maka vea'mokizmi zmarimpamo so'e hania kazigati, Barabasi kazufe nezamino, Jisasina sefu amiho hige'za, sefu amitazageno keka zafare ahe'za hantisagu avrezmi'ne.

**Sondia vahe'mo'za Jisasina azanva ante'naza naneke**  
(*Mat 27:27-31, Jon 19:2-3*)

<sup>16</sup>Anante sondia vahe'mo'za avare'za mrrerisa kumapi ufre'naze. (E'i ana kumara Gavana ne'mofo kumapi) maka Roma sondia vahetamina ome

ke hutru hu'naze. <sup>17</sup>Zamagra fitunke kukena hunente'za, ave'ave nofite kini vahe'mokizmi fetorikna huza fetori tro hu'za asenire antaninte'naze. <sup>18</sup>Kezanke hunte'za, Jiu vahe'mofo kinimokagura muse hugantone. <sup>19</sup>Mago'ane kno eriza asenire nemasagi'za, z mavetu ahenente'za, zmarena renamagiza, pri hu'za havi mono hunte'naze. <sup>20</sup>Zamagrama azanava anteteza fitunke kukena erizafi netre'za, ete Agri kukena eri huntete'za, keka zafare aheza hantinaku megia'avare'za vu'naze.

### Keka zafare Jisasina ahe'naza naneke

<sup>21</sup>Sairini kumateti ne' Saimoni, (Aleksendane Rufusikizni neznafe) fegu'ati enevige'za, keka zafa'a erio hu'za hunente'za kofintageno eri'ne. <sup>22</sup>Jisasina avare'za Golgote nehaza agonare uhnati'naze. (Tagri kefima rukrahe'ma hanunana, anu zaferine hu'ne.) <sup>23</sup>Anante waini tine mere zafa arima'ane magopi taginte'za eri havia hute'za tagiami'zana, one atre'ne.

<sup>24</sup>Hagi rugeka zafare ahete'za, mago'mo tagatere simo erisie nehu'za taisi zokogo re'za kukena'a refko hu'naze. <sup>25</sup>Nanterama zage hanatino 9 kiloki hige'za, Jisasina rugeka zafare ahe'naze.

<sup>26</sup>Ahe'naza nanekema avoma krente'nazana, JIU VAHE'MOKIZMI KINI NERE, huza krente'naze. <sup>27</sup>Ana nehu'za tare kumzafa netrena magoka znahe'za, magomofona azantmaga'a nehantiza, magomofona hoga'a hanti'naze. <sup>28</sup>[Ana nehzageno korapa'ma Anumzamofa'avontafepi kre'nea kemofo avufga'a efore' hu'ne. Ana kemo'a, hazenke vahe'kna hugahie hu'ne (Aisa 53:12)]. <sup>29</sup>Hagi anante'ma vute ete nehu'za vahe'mo'za azanva ke hu'za, Oho! Kagra ra mono nona tapage hunka tagufa knafi kigahue hu'nana nere, nehu'za zmage'na ru'naze. <sup>30</sup>Kagra ka'a kaza hunka keka zafaretira eramio, hu'naze! <sup>31</sup>Anahukna hu'za ranra prisi kva vahe'mo'zane kasegere ugagota hu'naza vahe'mo'za, azanva ke hunte'za, ru vahe azama nehiaza huno Agra'a aza osugahifi? <sup>32</sup>Atregeno Kraisi'a Israeli vahe'mokizmi kini ne'mo'a, keka zafaretira menina eraminketa negeta, tamentinti hamaneno! Tare ne'trema keka zafare'ma ahe'za hanti'naza ne'tremokea, anazanke huke Jisasina azanava ke hunte'na'e.

### Jisasi fri'nea naneke

(Mat 27:45-56, Luk 23:44-49, Jon 19:28-30)

<sup>33</sup>Ana knazupa zgemo'a anuntu age higeno, maka ana mopafina hanimo refitegeno vuno kinaga 3 kiloki higeno rumsa hu'ne. <sup>34</sup>Tri (3) kiloki higeno Jisasi'a agra kefi ranke huno kezatino, ELOI ELOI LEMA SABATANI? Ana kemo'a anage hu'ne, ANUMZANIMOKE ANUMZANIMOKE, NAHIGENKA KAMAGENA HUNENAMINE? (Sam-Zga 22:1)

<sup>35</sup>Hanki tva'onte mani'naza vahe'mo'za nentahi'za, anage hu'naze, antahiho, Ilaijanku ke nehie hu'za hu'naze. <sup>36</sup>Hagi mago'mo aga reno



vuno mi'mi'tata hu'nea waini timpi kapukua ome reteno, zotare vazigase huno erino Jisasi nesigu eme nemino anage hu'ne, atrenenketa Ilaijama eme avarefenka atresigura kamneno! <sup>37</sup>Hianagi Jisasi'a ran krafa nehuno, vgare asimu anteteno fri'ne. <sup>38</sup>Ana nehigeno ra mono nomofo agu'afi hanti'naza tvaravemo, anagamuti ruhakeke hutare huno henkamu erami'ne. <sup>39</sup>Hanki 100teti'a sondia vahete kva (centurian) ne'mo Jisasina avuga mani'nenon nefrino hiazana keteno, anage huno hu'ne. Tmage e'i nera Anumzamofon Mofavre mani'ne huno hu'ne! <sup>40</sup>Mago'a anemo'za ogantu'a mani'ne'za uruha ke'naze. Ana a'nefina, Makdala kumateti Meriki, Saromeki mago Meri'a (osi Jemisine, Josefekizni neznareraki) hu'za mani'naze. <sup>41</sup>Ana a'ne zgamo'za Jisasi Galili mopare mani'nege'za amage nente'za aza nehaza ane zgane, mago'a anampina Jerusale nege'za avaririza e'naza ane zgane mani'naze.

### Jisasi asente'naza naneke

(Mat 27:57-61, Luk 23:50-56, Jon 19:38-42)

<sup>42</sup>Anazama fore hu'neana Frante zupa kinage. Mni fru hukna esigu (Sabat) retro tra nehaza kna e'ne. <sup>43</sup>Arimatia kumateti Josefe'a koro osu hanave enerino, Jisasi avufa'ama erisigu Paeroti ome antahige'ne. (Ana nera kanisol vahepina agi me'negeno, Anumzamofon Kuma esigu nentahino aveganentea nere.) <sup>44</sup>Jisasima frine higeno'a, Paeroti antri nehuno, 100teti'a sondia vahete kva (centurian) ne' ke huno frinesigu antahige'ne. <sup>45</sup>Ana sondia kva ne'mo hago fri'ne huno Paerotina asmigeno, knareki avufga erinka vuo huno Josefena hunte'ne. <sup>46</sup>Josefe'ma efeke tavrave miza huno avufa'a eri mopafi atreno, ana efeke tavravenu kazrinteno, havefi frage'za tro hunte'naza kerifi ome asenteno, have rekrehe huno kama efrete runkni re'ne. <sup>47</sup>Makdala kumateti Meriki, Meri Josefe nereraki huke anama asentea kumara ke'na'e.

### Jisasi'a fripinti oti'nea naneke

**16** <sup>1</sup>Mni fruhu kna (Sabat) vagarege'za Makdalati Meriki, Maria Jemisi nereraki, Salomeki hu'za mananentake masave Jisasi avufare ome frentenaku miza se'naze. <sup>2</sup>Ana knamofon ese zupa (Sonta) nantera zge nehnatige'za, Jisasi kerirega vu'naze. <sup>3</sup>Nevu'za ontahige antahige hu'za, kerimofon kafantema rehiza hu'nea havea iza rekrehe hutregahie, hu'za hume vu'naze. <sup>4</sup>Hianagi tusi'a haveagi, ko revahe hutreneege'za ome ke'naze. <sup>5</sup>Anante have kerigampi ufre'za kazana, mago nehaza ne'mo efeke kukena huno tmaga'a kaziga mani'negeno ome nege'za zmagogogu hu'naze. <sup>6</sup>Hianagi anage huno zmasami'ne tmagogogura osiho, Nazareti Jisasima keka zafarema ahe'naza ne'ku nehakaze. Hianagi Agra ko otine. Amafina omanine, avufa'ama ante'nazarera ami'nagi keho! <sup>7</sup>Hianagi vutma amage'ma nentaza disaipol naga'ane, Pitanena ome

zmasamiho, Agra vugota huno Galili vu'ne, koma tmasami'nea kante antetma anantega Jisasina ome kegahaze. <sup>8</sup>Anagemama hige'za zmagare'za keria atre'za atinerami'za, zmahirahi nerege'za zmagogogu hu'naze. Na'ankure zmagara koro nehu'za, mago vahere hu'za ozmasmi'naze.

**Jisasi'a amage'nentaza disaipol nagate efore hu'nea naneke**  
(*Mat 28:9-10, Jon 20:11-18*)

<sup>9</sup>[Hagi ana knamofo ese zupa (Sonta), nanterame Jisasi'a fri'nefinti otiteno, esera Makdala kumate a' Meri, 7ni'a havi avamu agu'afi maninogeno eri atrente'nea ate efore hu'ne. <sup>10</sup>Jisasi'ene vano nehza vahe'mo'za zavi krafage nehazageno ana a'mo ome zmasmi'ne. <sup>11</sup>Ana a'mo'a, Jisasi'a otino asimuna erino maninege'na ke'noe hunoma hia kegura, antahi omi'naze.

**Tare amage'ma nenta'a disaipol netremo ke Jisasi ke'na'a naneke**  
(*Luk 24:13-35*)

<sup>12</sup>Ana'ma hutegenona tare ne'tremo'kea Jerusale atreke fegi'a nevakeno, Jisasi avufagamo'a ruzahene nehigeno znagrite efore hu'ne. <sup>13</sup>Fore nehigene kete'ne rukrehe hu'ne e'ne, mago'a mani'namokizmi eme zmasamige'za, anankegura zamentinti osu'naze.

**Jisasi'a amage nentza naga'a eri'za zmi'nea naneke**  
(*Mat 28:16-20, Luk 24:36-49, Jon 20:19-23, Apo 1:6-8*)

<sup>14</sup>Ana huteno 11ni'a amage'ma nentaza disaipol nagatera, ne'za nene'za maninageno, Jisasi'a zmagrite efore nehuno, frinefinti otine hu'za zmasaminaza kere antahi ozami'naza zankura, nahigeta tamentintia osu'naze huno ke zmasu'ne. <sup>15</sup>Anage huteno, maka moparega vutma knare musenke ome huama hutma, hakare vahera zmasamiho. <sup>16</sup>Hagi iza'o Nagriku amentinti nehuno, mono ti fre snimofona Anumzamo'a agu'vazina knare huno manigahie. Hianagi iza'o amentinti osanimo'a, keagafi manino fanana hugahie. <sup>17</sup>Hagi zamentinti hanamo'za amanahu avame'za erigahaze. Nagri nagirera havi avamura hunente'za, kasefa zamageru arugahaze. <sup>18</sup>Ha' osifa'vea zmazanu aze'neri'za, avuataga zama nesnaza'zamo'a zmazeri haviza nosinke'za, kri vahete zmazama antesageno'a, krizamimo'a amane hinke'za, knare hu'za manigahaze.

**Jisasina avregeno monafi mareri'nea naneke**  
(*Luk 24:50-53, Apo 1:9-11*)

<sup>19</sup>Anage huno zamasmitegeno, Anumzamo'a Jisasina avareno monafi marerino, azantmaga kaziga ome antegenona mani'ne. <sup>20</sup>Ana huno vutege'za, amage'ma nentaza nagamo'za maka kaziga vano nehu'za, Ramofona kea huama nehazageno, Jisasi'a ana kezmi'a eri hanavetino avame'zane, kaguva'zanena anama hazankefina hu'ne.]